

2 SAMUEL (The Second Book of Samuel)

Sawl duenae

¹ Sawl a due hnukkhu, Devit teh Amaleknaw a theinae koehoi a ban teh, Ziklag kho hnin hni touh ao. ² A hnin thum hnin vah tami buet touh amae hni a ravei teh a lû dawk vaiphu a kâphuen nalaihoi a tho. Devit koe a pha navah talai dawk a tabo. ³ Devit ni vah nâ lahoi maw na tho telah a pacei. Ahni ni Isarelnaw e tumpupnae koehoi ka yawng telah ati.

⁴ Devit ni hetheh bang e hno nama, dei haw atipouh. Ahni ni Isarelnaw teh, tarantuknae hmuen koehoi taminaw a yawng awh teh, tami moikapap a due. Sawl hoi a capa Jonathan hai a due toe telah bout a dei pouh.

⁵ Devit ni kadeikung thoundoun koe, bangtelah hoi maw Sawl hoi a capa Jonathan a due tie na panue telah atipouh.

⁶ Hote thoundoun ni, kai teh Gilead mon dawk ka pha navah, Sawl ni a tahroe a vaiteh leng hoi marangransanaw ni rek a pâlei awh. ⁷ Sawl ni hnukkhu lah a khet navah kai hah na hmu teh na kaw. ⁸ Kai ni vah, ka o ka ti pouh. Nang hah apimaw telah na pacei. Kai teh, Amalek tami doeh telah bout ka ti pouh.

⁹ Sawl ni kai koe tho nateh, kai na thet leih, kai ka due thai hoeh dawkvah, puenghoi patawnae ka khang telah ati e patetlah. ¹⁰ Ahni koe ka

kangdue teh ka thei. Bangkongtetsawiteh, hot-telah a rawp tounge dawkwah hring mahoe toe tie ka panue. A lû dawkwah kâmu e bawilakhung hoi a kut dawkwah a buet e cawce hah ka rading pouh teh, ka bawipa koevah ka sin telah a dei.

¹¹ Dêvit ni ahni hah a ravei, hot patetlah a taminaw ni lengkaleng a sak van aw. ¹² Sawl hoi a capa Jonathan Bawipa e taminaw hoi Isarel imthungaw ni, tahloi hoi a due dawkwah ahni hanlah tangmin totouh a khuika aw teh rawca a hai aw.

¹³ Hote kamthang ka dei e thoundoun koe Dêvit ni, nang teh nâ lahoi maw na tho telah a pacei. Kai teh Jentel mipun Amelek tami doeh telah a dei. ¹⁴ Dêvit ni ahni koe, BAWIPA ni satui awi e thei hanelah bangkong maw na kut na pho. ¹⁵ Hahoi, Dêvit ni thoundoun buet touh a kaw teh, ahni hah thet lawih atipouh e patetlah thoundoun teh a thei.

¹⁶ Dêvit ni na thipaling teh nama e na lû van bawt naseh. Bangkongtetsawiteh, nama e na pahni roeroe hoi BAWIPA satui awi lah kaawm e ka thei na ti telah atipouh. ¹⁷ Dêvit ni Sawl hoi Jonathan hah a khui. ¹⁸ Judahnaw koe a cangkhai hane lilava la tie hateh, Jashar e cauk dawkwah thut e la hah doeh. ¹⁹ Isarel na bawilenna, na hmuen rasang dawkwah, duena na khang toe. Tami athakaawme taminaw hai a due aw toe. ²⁰ Gath vah pathang aw hanh. Askelon khopui e lam dawkwah thaisak aw hanh. Filistin canunaw a lunghawi aw langvaih. Vuensom ka a hoeh e napuinaw ni a lunghawi aw langvaih tie ngaihri han ao. ²¹ Oe Gilboa monnaw, nangmae

lathueng tadamtui hoi khotui bawt hanh naseh. Law ni thueng kawī e a pawhik tâcawt sak hanh naseh. Bangkongtetpawiteh, hote hmuēn koe athakaawme ni a sin e saiphei, Sawl ni a sin e bahling, satui hoi hluk hoe e saiphei patetlah tâkhawng awh. ²² Thei e naw e thi koehoi, thaonae athâw koehoi, Jonathan e pala teh hnuklah bout ban hoeh. Sawl e tahloi hai ayawm lah ban hoeh. ²³ Sawl hoi Jonathan teh a hringnae ngai a tho, a due roi nahai kâkapek roi hoeh. Mataw hlak a hue a rang teh sendek hlak a tha ao roi. ²⁴ Oe Isarel canunaw Sawl hah khui awh haw. Ngai kaawm e hni paling ka khohnat sak e, sui hoi talung apfu kaawm e hoi na ka pathoupkung doeh. ²⁵ Taran kâtuknae koe athakaawme taminaw a due awh toe. Oe Jonathan nange karasangpoung e a hmuennaw dawk nang teh na due toe khe. ²⁶ Ka nawngha Jonathan nang dawk ka kângairu. Nang teh ka hui kahawipoung lah na o teh, kai na lung-patawnae teh kângairu, napuinaw lungpataw e a cei takhai. ²⁷ Thakaawmnaw hai a due awh toe. Tarantuknae senehmaicanaw hoi koung a kahma toe.

2

Devit satui awinae

¹ Hotnaw hnukkhu hoi Devit ni BAWIPA hah a pacei. Judah ram kho buetbuet touh dawk ka cei han maw telah ati. BAWIPA ni cet loe atipouh. Devit ni nâ lah maw ka cei han atipouh. Hebron kho lah atipouh. ² Devit e a yu roi Jezreel kho e Ahinoam hoi Karmel tami Nabal e a yu Abigail hoi a cei awh. ³ Ama koe kaawm

e taminaw, imthungnaw hai Devit ni a kaw teh ahnimanaw teh, Hebron khonaw dawkh a sak awah. ⁴ Judah taminaw a tho awah teh, Devit hah siangpahrang hanelah satui a awi awah. Ahnimouh ni Devit koe, Sawl ka pakawm naw hah Jabesh Gilead taminaw doeh telah a dei pouh awah.

⁵ Hatdawkvah Jabesh Gilead taminaw koe Devit ni patounenaw a patoun teh, ahnimouh koevah nangmae bawipa Sawl dawkh na lungmanae kamnue sak awah teh, na pakawp awah dawkvah BAWIPA ni yawhawinae na poe awah naseh. ⁶ BAWIPA ni a lungmanae hoi a hawinae nangmouh dawkh kamnuek sak naseh. Hete hno na sak awah dawkvah na lungmanae kai ni na patho awah han. ⁷ Atuvah, tha kâlat awah nateh, taranhawi awah, nangmae bawi Sawl teh a due toe. Judah imthungnaw ni a siangpahrang lah ka o hanelah satui na awi awah toe telah a ti.

Ishbosheth Isarel Siangpahrang lah o

⁸ Sawl e ransabawi Ner capa Abner ni Sawl e capa Ishbosheth hah Mahanaim kho lah a ceikhai. ⁹ Gilead ram Ashurnaw Jezreel khocanaw Ephraim ram, Benjamin hoi Isarelnaw pueng e lathueng vah siangpahrang hmuen koe a hruek awah. ¹⁰ Sawl capa Ishbosheth teh Isarelnaw uknae a kamtawng navah, kum 40 touh a pha. Kum hni touh a uk. Judahnaw ni dueng Devit e hnuk a kâbang awah. ¹¹ Hebron vah Devit ao teh Judah phun a uknae kum teh kum 7 touh hoi thapa yung 6 touh doeh.

Isarel hoi Judah a kâtuk

¹² Ner capa Abner hoi Sawl capa Ishbosheth e a san hah Mahanaim hoi Gibeon kho koe lah a cei. ¹³ Zeruiah capa Joab hoi Devit e sannaw a tâco aw hah teh, Gibeon tuikamuem koevah, a kâhmo aw hah, rek kadangka lah a tahung aw hah.

¹⁴ Abner ni Joab koevah thoundounnaw hah ka hmalah tâcawt aw hah naseh, ka hmalah kâhmo aw hah naseh. Joab ni tâcawt aw hah naseh telah a ti.

¹⁵ Sawl e capa Ishbosheth e tami Benjamin phun 12 touh hoi Devit e san 12 touh teh a thaw aw hah teh a cei aw hah. ¹⁶ A tarannaw e lû daw k lengkaleng a kâkuet aw hah teh a na daw k tahloi hoi a kâthut aw hah teh koung a rawp aw hah. Hatdawkvah Gibeon vah kaawm e naw ni haw e hmuen teh Helkathhazzurim (tahloi hruepatue hmuen) telah ati aw hah.

¹⁷ Hote hnin daw k kâtheinae a patawpoung. Abner hoi Isarelnaw Devit e a sannaw hmalah a sung aw hah. ¹⁸ Hawvah Zeruiah capa Joab hoi Abisai hoi Asahel hai ao. Asahel teh sayuk patetlah a hue a rang. ¹⁹ Asahel ni Abner hah avoilah aranglah phen laipalah a pâlei. ²⁰ Abner ni a kamlang sin teh, nang hah namaw Asahel telah ati. Ahni ni oe kai doeh telah atipouh. ²¹ Abner ni ahni koevah, avoilah aranglah phen haw, thoundoun buetbuet touh e puengcang hah lat pouh telah ati. Hatei Asahel ni ama a pâlei e hah phen takhai han ngai hoeh. ²² Abner ni Asahel koevah na phen takhai lei bang kecu daw k maw talai daw k rep ka tabaw k lah na thut han. Na hmaunawngaha Joab mei ka hmu ngam han namaw telah bout atipouh.

²³ Hatei Asahel ni lawk ngai pouh hoeh dawkvah, Abner ni tahroe hoi a von koehoi a thut teh a hnukthun lah tahroehmo pawk a yawng teh, hote hmuen koe a rawp teh a due. Asahel a rawp teh a duenae hmuen koe ka tho pueng ni ouk a kangdue awh. ²⁴ Joab hoi Abisai ni Abner hah pou a pâlei roi, Gibeon ram thung e lam teng Giah teng e Ammah mon koe a pha nah kanî a khup .

²⁵ Benjaminaw teh, Abner koe a kamkhueng awh teh, ah buet touh lah ao awh teh mon dawka kangdue awh. ²⁶ Abner ni, Joab a hram sin teh, tahloi ni pou na bouk han namaw apoutnae dawka kâhat han tie na panuek hoeh maw. Bangkongmaw taminaw hah a hmaunawng ha ni a pâleinae koehoi, ban hanelah dei pouh laipalah na o han atipouh.

²⁷ Joab ni Cathut a hring e patetlah dei laipalah awm haw, atangtho ditouh ka taminaw ni na pâlei awh han rah atipouh.

²⁸ Joab ni mongka a ueng teh, taminaw a kangdue awh. Isarelnaw pâlei awh hoeh. Tuk awh hoeh toe. ²⁹ Abner hoi a taminaw teh karum tuettuet ayawn dawka a cei awh teh, Jordan tui a raka awh hnukkhu Bithron ram a tapuet awh teh Mahanaim a pha awh.

³⁰ Joab teh Abner a pâleinae koehoi a ban teh, taminaw a pâkhueng navah, Devit hoi Asahel e taminaw 19 touh awm hoeh, a due awh toe. ³¹ Hatei teh Devit e taminaw ni Benjaminaw hoi Abner taminaw 360 touh a thei awh. ³² Asahel e a ro a la awh teh Bethlehem e a na pa e tangkom dawka a pakawp awh. Joab hoi a taminaw karum

tuettuet a cei aw h teh khodai nah Hebron vah a pha aw h.

3

Devit e capanaw

¹ Sawl imthung hoi Devit imthung hah atueng moi kasawlah a kâtuk aw h. Devit imthung hoehoe a thao aw h. Sawl imthung teh hoehoe a tha ayoun aw h. ² Devit ni Hebron kho vah capa a tawn. Camin Amnon, Jezreel tami Ahinoam koehoi e doeh. ³ Apâhni e teh, Khileab, Karmel tami Nabal e yu Abigail koehoi e doeh. Apâthum e teh Absalom, Geshur siangpahrang Talmi canu Maakah capa doeh. ⁴ Apali e teh, Adonijah Haggith capa doeh. Apanga e teh, Shephathiah, Abital capa doeh. ⁵ Ataruk e teh, Ithream Devit e yu Eglah koehoi e doeh. Hetnaw teh Devit capanaw Hebron kho daw k a khe e naw doeh.

Abner Devit koe lah a kampang

⁶ Sawl imthung hoi Devit imthung a kâtuk aw h navah, Abner teh Sawl imthung koe lah a tha pou a sai. ⁷ Sawl ni ado a tawn, A min teh Rizpah, Aiah canu doeh. Ishbosheth ni Abner koe vah bangkong apa e ado koe na kâen telah atipouh.

⁸ Ishbosheth lawk a dei e ni Abner hah a lung puenghoi a khuek sak. Judah taminaw e ui e lû namaw, sahnin ditouh na pa Sawl imthung-naw hoi a hmaunawngaha hoi a huikonaw koe lungmanae kamnue sak e lahoi Devit e kut daw k ka poe aw h hoeh. Nang ni hete napui kong daw k yonnae ka sak e patetlah na pouk. ⁹ Sawl imthung daw k hoi uknae la pouh han Isarel

hoi Judah lathueng vah Dan hoi Beersheba to touh. ¹⁰ Devit e bawitungkhung kangdue sak hanelah BAWIPA ni Devit koe lawk a kam e patetlah ka sak hoehpawiteh, Cathut ni Abner heh a ngainae patetlah sak naseh, hothlak kapap lahai sak naseh.

¹¹ Abner hah a taki toung dawkvah Ishbosheth lawkkam touh boehai pathung hoeh. ¹² Abner ni amae yueng lah Devit koe patounenaw a patoun teh hete ram heh apie maw kai koe lawkkamnae sak haw. Isarelnaw nang koe lah kampang hanelah, ka kut heh nang koe lah a kampang han telah a ti.

¹³ Devit ni ahawi nang koe lawkkamnae ka sak han. Hateiteh hno buet touh ka hei han. Kai na kâhmo hanelah na tho navah, Sawl canu Mikhal na thokhai hoehpawiteh, ka mei na hmawt mahoeht telah a ti.

¹⁴ Devit ni Sawl e capa Ishbosheth koevah Filistin tami vuensom 100 touh hoi ka ran e ka yu Mikhal hah na poe telah patounenaw a patoun. ¹⁵ Ishbosheth ni tami a patoun teh, a vâ Laish capa Paltiel kut dawke a thokhai. ¹⁶ A vâ teh a kâ laihoi a cei teh, Bahurim kho totouh a kâbang. Abner ni ahni koe cet nateh ban lawih telah atipouh teh a ban. ¹⁷ Abner ni Isarel kacuenaw a pâkhueng teh, ahnimouh koe, hah hoehnahlan teh Devit heh siangpahrang lah na ngai awh e doeh. ¹⁸ Atuvah tawmrasang awh leih. Bangkongtetpawiteh, BAWIPA ni Devit kong dawke ka san Devit kut dawke hoi ka tami Isarel hah Filistinnaw kut dawke hoi na rungngang han telah a dei atipouh. ¹⁹ Abner ni Benjamin taminaw a thainae koehai a dei. Hottelah Abner

ni Isarel taminaw hoi Benjamin imthungnaw ni ahawi ati awh e pueng Hebron vah Devit koe dei pouh hanelah a cei awh. ²⁰ Abner ni tami 20 touh hoi Devit aonae koe Hebron kho lah a cei teh, Devit ni roipu a sak teh, Abner hoi a taminaw a ca sak. ²¹ Abner ni Devit koevah, kathâw vaiteh, nang koe lawkkamnae a sak thai awh nahane hoi na pouknae patetlah lawk ka ceng thai nahan, Isarelnaw pueng ka bawipa koe pâkhueng hanelah, ka cei han telah ati. Devit ni Abner a patoun teh duem a cei.

Joab ni Abner a thei

²² Hatnavah, Joab hoi Devit e a sannaw teh taran a pâleinae koehoi a ban awh teh, hnopai moi a sin awh. Abner teh Devit hoi Hebron kho dawk rei awm roi hoeh. Devit ni a patoun toung dawkvah karoumcalah a cei. ²³ Joab hoi ama koe kaawm e taminaw pha awh navah, Ner capa Abner hah, siangpahrang koe a tho teh, ahni ni a ban sak toung dawkvah karoumcalah a cei telah Joab koe a dei pouh han. ²⁴ Joab teh Siangpahrang koe a kâen teh, bawipa, bangtelamaw na sak e hah khenhaw! Abner teh nang koe tho teh, bangkongmaw yout na cei sak. ²⁵ Ner capa Abner teh na panue, nang dum hanelah, na tâco na kâen, na sak e pueng panue han a ngai dawk ka tho e doeh telah a ti. ²⁶ Devit koehoi Joab a tâco navah, Abner hah pâlei hanelah patounenaw a patoun. Sirah tuikhu koehoi bout a bankhai. Hatei teh Devit panuek hoeh. ²⁷ Abner ni Hebron kho a pha navah, Joab ni rapan longkha koe arulahoi lawk kâpan hanelah a ceikhai teh a hmaunawngha

Asahel thi a palawngnae koe a von dawk a thut teh a due. ²⁸ Hathnukkhu, Devit ni a thai navah, Ner capa Abner thi palawngnae kong dawk kai hoi ka uknaeram teh, BAWIPA hmalah pou ka kamthoung han. ²⁹ Joab hoi a na pa imthungnaw e lû dawk bawt na seh, Joab imthung dawk thihnaipatawnae, hrikbei, hnamkhun, tahloi hoi duenae, takangnae pout hanh naseh, telah a ti. ³⁰ Hottelah, Joab hoi a nawngaha Abisai ni Abner hah a thei van, bangkongtetspawiteh, Asahel hah Gibeon kâtuknae koe a thei dawk vah.

Abner dawk Devit a kângai kâthungnae

³¹ Devit ni hai Joab hoi ama koe kaawmnaw koe na hni hah ravek awh nateh Buri kâkhu awh. Abner hanelah khuikanae sak awh atipouh teh, Devit ni ro hah a kâbang sin. ³² Abner teh Hebron vah a pakawp awh teh, siangpahrang hoi taminaw teh Abner phuen koe a ka awh. ³³ Siangpahrang Abner a ka khai awh teh, Abner teh tamipathu due la maw a due han. ³⁴ Na kut hai katek hoeh, na khok hai hlong buet hoeh. Tamikapo kut dawk hoi kadout e patetlah duenae na tawng toe telah ati. Taminaw hai bout a kâ awh. ³⁵ Khohmo hoehnahlan Devit teh rawca ca sak hanelah taminaw a tho awh. Hatei Devit ni kanî a khup hoehnahlan rawca thoseh, alouknaw hai thoseh ka cat pawiteh, Cathut ni a ngai e patetlah na tet naseh, hothlak kapap lahai na sak naseh telah thoe a kâbo. ³⁶ Hote hah taminaw ni a thai toteh, a lunghawi awh. Siangpahrang ni a sak e pueng taminaw ni a ngai awh teh a lunghawi sak awh. ³⁷ Bangkongtetspawiteh, tamihu hoi Isarelnaw

pueng ni hat hnin vah Ner capa Abner thei e hah siangpahrang khokhangnae nahoe h tie a panue aw h. ³⁸ Siangpahrang ni a taminaw koe sahnin vah Isarelnaw daw k bawi hoi tami kalen a due tie na panue k aw h hoe h maw. ³⁹ Kai teh satui aw i e lah ka o eite h, sahnin ka tha ayoun. Zeruah capa lah kaawm e hetnaw teh kai h lak a thao aw h. Ka hawihoe h e patetlah BAWIPA ni pathung nase h telah a ti.

4

Ishbosheth theinae

¹ Sawl e capa Ishbosheth ni Hebron vah Abner a due tie a thai navah, a tha a youn. Isarelnaw pueng a puen aw h teh kângairu aw h. ² Sawl capa Ishbosheth ni ransanaw kaukung kahni touh a tawn teh, buet touh e min teh Baanah, alouke buet touh e min teh Rekhah doeh. Benjamin capa Beeroth tami Rimmon capa doeh. Bangkoktetpawite h, Beeroth teh Benjamin ram e lah a pouk aw h. ³ Beerothnaw teh Gittaim vah a yawng aw h teh, atu sittouh haw vah ao aw h.

⁴ Sawl capa Jonathan ni capa khokkhem a tawn teh, kum 5 a pha navah Jezreel kho lahoi Sawl hoi Jonathan e kamthang a thai navah, ka kheyawn e ni a tawm teh a yawngkhai navah, karanglah a yawng dawkvah, camo hah a bo teh a khokkhem. Hote camo min teh Mephibosheth doeh. ⁵ Beeroth phun Rimon capa Rekhah hoi Baanah hah a cei roi teh, Ishbosheth im vah kanîthun vah a pha. Hatnae tueng daw k Ishbosheth teh ouk a i. ⁶ Haw e hmaunawng ha Rekhah hoi Baanah teh, cakang ka lat hane

patetlah a kâsak roi teh im lungui a kâen roi.
⁷ A inae khan dawk a inae koe Ishbosheth e von dawk a thut, a lû a tâtueng roi teh, ayawn lam lahoi karum tuettuet a yawng roi teh a hlout roi. ⁸ Ishbosheth e a lû Hebron kho Devit koe a thokhai teh, siangpahrang koevah kenhaw! hi vah nang thei han ka kâcai e na taran Sawl capa Ishbosheth lû hei, Bawipa ni ka bawipa e moi, sahnin vah Sawl hoi a catoun koevah a pathung toe.

⁹ Hatei, Devit ni Beeroth tami Rimmon capa Rekhav hoi a hmaunawngaha Baanah koe kho pouk runae thung hoi na ka ratang e BAWIPA a hring e patetlah, ¹⁰ Kamthang kahawi ka phawt e lah pouk vaiteh, kenhaw! Sawl teh koe a due toe telah tami buet touh ni a dei. Ahni ka man teh Ziklag vah ka thei. Hothateh kamthang kahawi ka phawt e a tawkphu lah ka poe e doeh. ¹¹ Hot dueng nahoeh rah, tamikaponaw ni tamikalan hah a imthung e a inae koe thet pawiteh, hoe sak hane kawî nahoehmaw. Atu roeroe ahnie thi hah nangmouh dawk ka hei vaiteh nangmouh hah talai van hoi he pahma hanelah a kamcu nahoehmaw telah ati.

¹² Devit ni a thoundoun hah kâ a poe teh, a thei hnukkhu a kut a khok a tâtueng pouh. Hebron tui kamuem koe a bang aw. Ishbosheth e lû teh a la pouh teh, Hebron e Abner e tangkom koe a pakawp aw.

5

Devit ni Isarelnaw a uk

¹ Isarel miphunnaw Hebron kho Devit aonae koe a tho aw. Kaimanaw hah na hru hoi na thitak katang doeh. ² Ayan vah kaimae lathueng Sawl siangpahrang lah ao navah, Isarelnaw katâcawtkhaikung hoi kâenkhaikung lah ao. BAWIPA ni ka tami Isarelnaw na paca han, na uk han telah nang koe ati telah a ti. ³ Hatdawkvah, Isarel kacuenaw Hebron kho siangpahrang koevah a tho aw. Devit siangpahrang ni Hebron vah BAWIPA e hmalah ahnimouh hoi lawkkamnae ka sak. Devit teh Isarelnaw e siangpahrang lah satui a awi aw. ⁴ Devit ni uknae a kamtawng navah kum 30 a pha teh kum 40 touh a uk. ⁵ Hebron kho daw. Judahnaw kum 7 thapa 6 touh a uk. Jerusalem vah Isarel hoi Judahnaw kum 33 a uk.

Jerusalem tânae

⁶ Siangpahrang ni a taminaw a kaw teh, hote ram daw. Jerusalem kho lah a cei aw. Ahnimanaw ni hete kho daw na kâen aw mahoeh. Mitdawn hoi khokkhemnaw ni hai Devit teh hete kho thung kâen mahoeh, ahnimouh ni na ngang aw han telah ati aw.

⁷ Hateiteh, Devit ni Devit khopui tie Zion rapanim a tuk teh a tâ. ⁸ Hote hnin daw. Devit ni, Devit hringnae ni a hmuhma e Jebusit tami mitdawn hoi khokkhem thei hanelah tui pat ka raka e ransa pueng teh ransabawinaw e lû lah ka o sak han, hatdawkvah mitdawn hoi khokkhemnaw teh im thung kâen mahoeh telah a ti.

⁹ Dedit teh rapanim dawk ao teh, Dedit khopui telah min a phung. Millo hmuen a tengpam thoseh, a thung lahai thoseh a sak. ¹⁰ Hottelah hoi Dedit teh hoe a rounng teh ransahu BAWIPA Cathut hoi rei ao.

¹¹ Taire siangpahrang Hiram ni Dedit koe patounenaw a patoun teh, Sidar thing, im-sakkathoum, talungdêikathoum a patoun awh teh, Dedit hane im a sak pouh awh. ¹² BAWIPA ni Isarelnaw koe siangpahrang lah ahni teh a caksak e hoi, a tami Isarelnaw hanelah uknaeram a tawmrasang tie Dedit ni a panue.

¹³ Dedit ni Hebron kho hoi a kampuen hnukkhu, Jerusalem kothung e yu a puidonaw bout a la teh, a ca moikapap bout a tawn. ¹⁴ Jerusalem kho sak Dedit ni a khe e a canaw e min teh: Shammua, Shobab, Nathan, Solomon, ¹⁵ Ibhar, Elishua, Nepheg, Japhia, ¹⁶ Elishama, Eliada hoi Eliphelet naw hah doeh.

Filistin tânae

¹⁷ Filistinnaw ni Dedit hah Isarelnaw koe siangpahrang lah ao nahan satui a awi tie a panue awh navah, Filistinnaw pueng ni Dedit tawng hanelah a cei awh. Dedit ni hote hah a thai toteh rapanim dawk hoi a kum. ¹⁸ Filistinnaw hai a cei awh teh, Rephaim yawng dawng phang a kâkayei awh. ¹⁹ Dedit ni Filistinnaw tuk hanelah ka cei han maw, ka kut dawng na poe han maw telah BAWIPA a pacei. BAWIPA ni Dedit koe, cet loe. Kai ni Filistinnaw na kut dawng na poe han telah atipouh.

²⁰ Dedit teh Baalperazim lah a cei teh, hawwah Dedit ni ahnimouh a thei. BAWIPA ni, tui

ni a raphoe e patetlah katarannaw hah ka hmaitung vah koung na raphoe pouh telah ati. Hatdawkvah, hote hmuen hah Baalperazim telah min a phung. ²¹ Hote hmuen koe Filistinnaw ni a ceitakhai e meikaphawknaw hah Devit hoi a taminaw ni koung a raphoe pouh.

²² Filistinnaw bout a tho aw hawh teh, Rephaim yawn daw k phang a kâkayei aw hawh. ²³ Devit ni BAWIPA koe a pacei navah, ahni ni takhang aw hawh hanh, a hnuk lahoi kalup aw hawh nateh batue kahrawng koehoi rongyawn aw hawh. ²⁴ Batuekung koe a pawlawk na thai toteh tuk aw hawh loe, bangkongtetpawiteh, Filistinnaw tuk hanelah na hmalah BAWIPA a la cei toe tinae doeh.

²⁵ BAWIPA ni kâlawk a poe e patetlah Devit ni a sak. Filistinnaw hah Geba hoi Gezer totouh a thei.

6

Jerusalem lah lawkkam thingkong a ceikhainae

¹ Devit ni Isarelnaw thung daw k hoi a rawi e 3,000 touh hah a pâkhueng. ² Devit ni a thaw teh, Judah ram e Baalejudah hoi Cherubim rahak kaawm e ransahu BAWIPA min lahoi kaw e Cathut e thingkong hah thokhai hanelah ama koe kaawmnaw hoi a cei aw hawh. ³ Cathut e thingkong teh leng katha daw k a hruek aw hawh teh, mon e Abinadab im thung e a rasa aw hawh. Abinadab capa Uzzah hoi Ahio ni leng katha a tanawt roi. ⁴ Uzzah teh Cathut e thingkong e ateng thoseh, Ahio teh thingkong hmalah thoseh a cei. ⁵ Devit hoi Isarelnaw teh ratoung, tamawi, tâbaw, vovit,

cecak naw a sin aw h teh, BAWIPA e hmalah thaothue hoi a tumkhawng aw h.

⁶ Nakhon hmuen a pha aw h toteh, maito roi ni Cathut e thingkong a kâhu et sak dawkvah, Uzzah ni a kut hoi thingkong hah a kuet. ⁷ BAWIPA ni Uzzah koe a lungkhuek teh a payonnae kecu daw k Cathut ni haw e hmuen koe a thei teh, Cathut e thingkong koevah a due. ⁸ Uzzah hah BAWIPA ni a thei dawkvah, Devit a lungkhuek teh hote hmuen teh Perez Uzzah telah ati, sahnin totouh a dei aw h. ⁹ Hot hnin dawkvah, Devit ni BAWIPA a taki teh, bangtelamaw BAWIPA thingkong hah kai koe a pha thai han telah ati. ¹⁰ Devit ni BAWIPA thingkong teh, Devit kho daw k hrueng laipalah Git tami Obed-Edom im vah a hruek. ¹¹ BAWIPA thingkong teh Git tami Obed-Edom im vah thapa yung thum touh ao. Obed-Edom hoi a imthung pueng BAWIPA ni yawhawi a poe.

¹² Siangpahrang Devit koevah, Cathut thingkong lahoi Obededom imthung hoi a im hoi lawnaw pueng BAWIPA ni yawhawi a poe tie a dei pouh aw h. Bout a cei teh Devit ni Cathut e thingkong hah Obededom im daw k hoi Devit kho lah lunghawicalah hoi a sin. ¹³ BAWIPA e thingkong kahrawmnaw teh vai taruk touh a takan hnukkhu hoi, maitotan hoi kathâw e tu hoi thuengnae a sak aw h. ¹⁴ Devit ni Ephod hah a kho teh thaonae abuemlahoi BAWIPA hmalah a lam. ¹⁵ Hottelah Devit hoi Isarelnaw ni a hrawm aw h. Mongka ueng laihoi, BAWIPA e thingkong hah a ceikhai aw h. ¹⁶ BAWIPA e thingkong teh Devit kho a kâen navah, Sawl e

canu Mikhal ni hlangaw daw k hoi a khet teh Devit siangpahrang BAWIPA hmalah a lam teh a dawkcaw k lai hoi a tho e hah a hmu navah, a lungthung hoi banglahai noutna hoeh e lah a pouk.

¹⁷ BAWIPA e thingkong a kâenkhai aw h teh a hruek aw h nahan Devit ni a yap e hni thung amae hmuen daw k a hruek aw h teh, Devit ni hmaisawi thuengnae hoi roum thuengnae a sak. ¹⁸ Devit ni hmaisawi thuengnae hoi roum thuengnae a sak hnukkhu, ransahu BAWIPA min lahoi taminaw pueng yawhawinae a poe. ¹⁹ Isarelnaw tongpa napui pueng koe vaiyei phen buet touh, moi ham buet touh, misur phen buet touh a rei hnukkhu, tami pueng amamanaw onae koe koug a cei aw h.

²⁰ Devit teh a imthungnaw yawhawi poe hanelah a cei teh a pha navah, Sawl e canu Mikhal ni a dawn. Sahnin e Isarel siangpahrang teh a sungrenpoug. Kayayeirai ka panuek hoeh e patetlah a sannu a sanpanaw e hmaitung vah caici lah doeh ao telah ati.

²¹ Devit ni a na pa hoi na imthung pueng e a yueng lah na rawi e lah ka o teh, BAWIPA e tami Isarelnaw lathueng siangpahrang lah na karawikung BAWIPA e hmalah ka sak mahoe h na maw. BAWIPA hmalah tumkhawng roeroe hanelah ao, telah atipouh. ²² Hethlak hai kayakhai hane kawilah ka o han, kama hoi kama totouh hai kâkayakhai han. Na dei e sannunaw ni teh kai hah na oup aw h han telah Mikhal hah bout a dei pouh.

²³ Hatdawkvah, Sawl canu Mikhal teh a due totouh ca sak hoeh toe.

7

Devit koe Cathut lawk a kam

¹ A hmuen pueng koe kaawm e a tarannaw e kut dawh hoi BAWIPA ni a hloutsaknae hah, siangpahrang ni a coe teh a im dawh karoum-calah ao navah, ² Siangpahrang ni profet Nathan hah kaw teh, khenhaw! kai teh Sidar thing im dawh ka o. Cathut e thingkong teh lukkarei yap e thung sut ao.

³ Nathan ni cet nateh na lung dawh kaawm e patetlah sak. Bangkongtetpawiteh, nang koe BAWIPA ao telah atipouh. ⁴ Hote tangmin vah BAWIPA e lawk hah Nathan koe a pha. ⁵ Ka san Devit koe cet nateh dei pouh, BAWIPA ni hettelah a dei, ka o nahane im nang ni na sak pouh han na maw. ⁶ Isarelnaw hah Izip ram hoi ka tâcokhainae koehoi im dawh kaawm hoeh, lukkareiim dawh doeh ka o. ⁷ Isarelnaw koe ka cei nah tangkuem dawh hoi ka tami Isarelnaw kawkhik sak hanelah kai ni ka patoun e lawkcengkungnaw koe nang teh kai hanelah Sidar thing hoi im hah, bangkongmaw na sak hoeh ka ti boimaw.

⁸ Hatdawkvah, ka san Devit koevah, ransahu BAWIPA ni a dei e teh, tu a pânae hmuen koe tu na khoum navah, ka tami Isarelnaw uk hanelah na rawi toe. ⁹ Na cei nah tangkuem koe kai ka o vaiteh tarannaw pueng na hmaitung ka thei vaiteh talai dawh a min ka lentoe e a min patetlah ka lentoe poung e min hah na

poe toe. ¹⁰ Ka tami Isarelnaw a onae hmuen hah ka rakueng pouh toe. Ahnimanaw bout a kampuen awh hoeh nahan, amamae hmuen koe o sak hanelah, ka caksak han. Tami kathoutnaw teh ayan e tueng dawk hoi thoseh, ¹¹ Ka tami Isarelnaw thung e lawkcengkungnaw hah ka rawinae tueng dawk thoseh, dudam e patetlah bout dudam awh mahoe toe. Nang hai tarannaw e kut dawk hoi na kâhat sak teh, na imthung hah a kangdue sak han telah BAWIPA ni a dei toe.

¹² Na hnin akuiep teh, mintoenaw hoi na kâhat torei teh, na thitak dawk hoi ka tâcawt e na capa hah ka tawmrasang vaiteh, a ram ka kangdue sak han. ¹³ Ahni ni ka min o nahane im a sak han. A uknaeram bawitungkhung a yungyoe ka caksak han. ¹⁴ A na pa lah ka o vaiteh, ahni teh ka capa lah ao han. Payonpakainae sak pawiteh tami ni a hno e bongpai hoi ka yue han. Tami ni a hem e patetlah ka hem han. ¹⁵ Hatei na hmalah ka takhoe e Sawl dawk hoi kai ni na pahrennae ka lae patetlah nange na ca dawk hoi ka lat mahoe. ¹⁶ Na imthung hoi na uknaeram teh yungyoe caksak e lah ao vaiteh, na bawitungkhung hah yungyoe caksak e lah ao han. Ka san Devit koe dei pouh, telah ati.

¹⁷ Hete lawknaw pueng hoi kamnuenae dawak kamnuek e naw patetlah Nathan ni Devit koe a dei pouh.

Cathut koe Devit a lunghawinae

¹⁸ Hatnavah siangpahrang Devit ni a kâen teh, BAWIPA e hmalah a tahung. Oe Bawipa Jehovah, bang patetlae tami lah maw ka o teh

ka imthung hai bang patetlah na maw. Hettelah na hrawi. ¹⁹ Oe Bawipa Jehovah, het hai na mithmu vah hno titca rah doeh. Hateiteh, na san imthung kong heh kum moikapap hanelah yo na la dei toe. Oe Bawipa Jehovah, hete hnonaw hai taminaw ni hottelah a sak aw h e doeh. ²⁰ Devit ni nang nama koe bangmaw a hloilah a dei han. Bangkongtetpawiteh, na san heh Oe Bawipa Jehovah nang ni kounge na panue. ²¹ Na lawk kecu hoi na lungpouk e boiboeh lah na sak e hno ka lentoe e hah na san koe na panue sak. ²² Hatdawkvah, Oe Bawipa Jehovah, nang teh na lentoe poung. Bangkongtetpawiteh, ka hnâ hoi ka thainae lah nang patet e awm hoeh. Nang nama hoeh laipalah Cathut alouke khoeroe awm hoeh. ²³ Izip ram miphun kuep hoi a cathutnaw thung hoi nama hanlah na ratang e, na taminaw hmalah ka lentoe e hno hoi na uk nahane daw k takikatho poung e hno ka sak hane hoi, a ma hanelah a rawi e, na tami Isarelnaw patetlah e, talai daw k miphun alouke apimaw kaawm. ²⁴ Bangkongtetpawiteh, na tami Isarelnaw hah a yungyoe na tami lah o nahane na coung sak teh BAWIPA nang nama teh a Cathut lah na o. ²⁵ Oe BAWIPA Cathut, na san daw k thoseh,ka imthung daw k thoseh, na dei e lawk hah a yungyoe caksak haw. Na dei tangcoung e patetlah sak lawih. ²⁶ Ransahu BAWIPA teh Isarelnaw ka uk e Cathut doeh telah na min hah yungyoe rasang lawi naseh. Nange na san Devit e imthung, na hmaitung caksak e lah ao han. ²⁷ Bangkongtetpawiteh, oe ransahu BAWIPA Isarel Cathut, na san koe vah

na imthung kangdue sak han telah lawk na dei toe. Hatdawkvah, na san ni a lungthin hoi hete ratoum ngainae na hmaitung sak hanelah a hmu toe. ²⁸ Oe Bawipa Jehovah nang teh Cathut lah na o. Na lawk teh atangcalah ao. Na hawinae na san dawk lawk na kam toe. ²⁹ Hatdawkvah, na san imthung heh, na hmalah yungyoe pou ao thai nahanelah yawhawinae poe haw. Bangkongtetpawiteh, Oe Bawipa Jehovah, nama ni yo na dei toe. Na yawhawinae hoi na san imthungnaw teh yungyoe hoi yawhawinae awm seh telah ati.

8

Devit ni pou tânae

¹ Hathnukkhu hoi Devit ni Filistinnaw hah a tuk teh a tâ. Hahoi Devit ni Metheg Ammah kho hah Filistinnaw e kut dawk hoi a la. ² Moabnaw a tuk aw haw teh, talai dawk a yan sak. Rui hoi a bangnue teh ahu kathum touh dawk hu hni touh a thei aw haw. Hottelah Moabnaw teh Devit ni imhu cawngnae kho lah a coung teh imhu ouk a poe aw haw. ³ Zobah siangpahrang Rehob e capa Hadadezer ni Euphrates tui teng e talai ram la hane a cei navah, Devit ni a thei teh, ⁴ marangransa 1,700, ransa 20,000, a man teh leng 100 touh ama han a hruek hnukkhu alouke lengnaw pueng koug a tâtueng.

⁵ Damaskas kho e Siria tami Zobah siangpahrang Hadadezer kabawp hanelah ka cet e hah Devit ni Sirianaw thung dawk e tami 22000 touh a thei. ⁶ Hahoi Devit ni Siria ram Damaskas kho dawk ransa a sak, Sirianaw teh Devit koe san

a toung aw h teh, imhu a cawng aw h. Dedit a cei nah tangkuem BAWIPA ni tânae a poe. ⁷ Dedit ni Hadadezer taminaw koehoi e suisaipheinaw a lawp aw h teh, Jerusalem kho vah a thokhai. ⁸ Dedit ni Hadadezer kho Betah hoi Berothai hoi rahum moikapap a la.

⁹ Hamath siangpahrang Toi ni Hadadezer ransa pueng Dedit ni koug a tâtueng tie a thai. ¹⁰ Hadadezer a tuk teh a tâ dawkvah, kâhuiko hane hoi yawhawi poe hanelah Toi capa Joram hah Dedit koe a patoun. Bangkongtetpawiteh, Adadezer ni Toi hah ouk a tuk boi toe. Joram ni suimanang, ngunmanang, rahummanang hah a sin pouh. ¹¹ Hote manangnaw hah Dedit siangpahrang ni BAWIPA koe thuengnae a sak. ¹² Siria, Moab, Ammon taminaw hoi Filistinnaw, Amaleknaw hoi Zobah siangpahrang Rehob capa Hadadezer koehoi e hnopai a la e naw doeh.

¹³ Dedit ni palawi yawn daw k hoi a ban lampa Sirianaw 18000 a thei dawkvah a min a kamsawng. ¹⁴ Edom ram tangkuem koe ransa a hruek. Edom khocanaw teh Dedit koe san a toung aw h. Dedit ni a ceinae tangkuem daw k BAWIPA ni tânae a poe.

¹⁵ Hottelah Dedit ni Isarelnaw a uk. A taminaw pueng lanna hoi a uk.

¹⁶ Zeruiah capa Joab teh ransanaw kaukung kacuepoung lah ao. Ahilud capa Jehoshaphat teh kamthang kathutkung lah ao. ¹⁷ Ahitub capa Zadok hoi Abiathar capa Ahimelek hah vaihma lah ao roi. ¹⁸ Jehoiada capa Benaiah teh, Kereth tami hoi Peleth taminaw e kacue lah ao. Dedit capanaw teh ram kaukung bawi lah ao aw h.

9

Devit ni Mephibosheth lung a pataw

¹ Jonathan koe pahrennae ka kamnue sak nahanelah, Sawl imthungnaw daw k hoi kaawm rae ao maw telah Devit ni ati. ² Sawl e sannaw thung e tami buet touh, a min Ziba ao teh Devit koe cei hanelah a kaw awh. Siangpahrang ni nang teh Ziba maw telah atipouh boteh, ahni ni, bokheiyah, na san kai doeh telah atipouh.

³ Siangpahrang ni Cathut lungpatawnae ka kamnue sak nahan Sawl imthungnaw thung daw k e kaawm rae awm hoeh na maw telah atipouh. Ziba ni, Jonathan ni capa buet touh a tawn teh a khokkhem telah atipouh.

⁴ Siangpahrang ni nâ maw ao telah a pacei. Ziba ni kenhaw! Lodebar kho e Ammiel capa Makhir im vah ao telah atipouh.

⁵ Hattoteh siangpahrang Devit ni tami a patoun teh, Lodebar kho e Ammiel capa Makhir im hoi ahni teh a thokhai awh.

⁶ Sawl capa Jonathan e capa Mephibosheth teh Devit koe a tho teh, a minhmai talai daw k tabei laihoi a tabut. Devit ni Mephibosheth telah a kaw, na san kai teh hivah ka o telah atipouh.

⁷ Devit ni na lungpuen hanh, na pa Jonathan kecu daw k na pahren hanelah, Sawl ni a tawn e pueng kai ni bout na poe han. Kaie caboi daw k bu pou na ven han toe telah atipouh.

⁸ A lûsaling teh kai ui ro patet e na san kai heh banglamaw khuek na pouk telah ati.

⁹ Siangpahrang ni Sawl e a san Ziba hah ama koe a kaw teh, Sawl hoi a imthung e hnopai pueng hah na bawipa e capa he ka poe toe.

¹⁰ Nama hoi na capa, na sannaw hoi lai na thawn pouh vaiteh, na bawi capa ni a ca hane kawi ao thai nahan, na tawk e a pawhik hah na tho khai han. Hateiteh, na bawipa e capa Mephibosheth ni ka caboi dawk bu pou a ven han telah atipouh. Ziba ni a ca 15 touh hoi a san 20 touh a tawn.

¹¹ Ziba ni siangpahrang koevah, siangpahrang ka bawipa ni na san koe kâ na poe e patetlah na san ni ka sak han telah ati. Siangpahrang ni Mephibosheth teh ka caboi dawk siangpahrang capa buet touh patetlah bu pou a ca han toe telah ati.

¹² Mephibosheth ni capa cahnoung Mika a min phung e buet touh a tawn. Ziba im dawk kaawm e pueng teh Mephibosheth e san lah ao awh.

¹³ Mephibosheth teh, Jerusalem kho dawk ao teh, hnintangkuem siangpahrang e caboi dawk bu a ven, a khok kahni touh hoi a khem.

10

Ammonnaw hoi Sirianaw tânae

¹ Hathnukkhu, Ammon siangpahrang teh a due. A capa Hanun ni a na pa e yueng lah siangpahrang a tawk.

² Dedit ni Hanun e a na pa Nahash teh kai koe ahawinae a sak dawkvah, pahrennae ka kamnue sak van han telah ati. A na pa a due nah lungpahawi hanelah a sannaw a patoun teh, Dedit e sannaw teh Ammonnaw e ram koe a pha awh. ³ Ammon miphun kacuenaw ni amamae a bawipa Hanun koevah, Dedit ni na barilawa dawkvah, nang koe lungmawng nahanelah, tami a patoun e na yuem maw. Dedit ni hete khopui

a raphoe thai nahan ka tuet hanelah nang koe a patoun aw h nahoehmaw telah atipouh aw h.

⁴ Hanun ni Devit e a sannaw a man teh, a pâkhamuen tangawn a ngaw pouh. A khohna hai a laheibaw totouh a a pouh hnukkhu a cei sak.

⁵ Hote kamthang hah Devit ni a thai toteh, ahn-imanaw teh a kaya poun dawkvah, ahnimanaw dawn sak hanelah a patoun teh, nangmouh teh pâkhamuen a saw hoehroukrak Jeriko kho dawkvah aw m aw h. Hahoi torei bout tho aw h telah atipouh.

⁶ Ammonaw ni vah, maimouh teh Devit e hmaitung panuetho e lah o aw h han tie a panue aw h teh, taminaw a patoun aw h teh, Bethrekhob kho hoi Aramzobah kho e Siria ransa 20,000, hoi siangpahrang Maakah e tami 1,000, hoi Tob ram e tami 12,000 touh hah a h lai aw h. ⁷ Devit ni hote kamthang a thai toteh, Joab hoi athakaawme ransanaw hah a patoun. ⁸ Ammonaw hah a tâco aw h teh, kho longkha koe a tungpup aw h. Aramzobah kho, Rehob, Tob kho hoi ka tho e Siria tami hoi Maakah siangpahrang e taminaw teh aloukcalah law vah ao aw h. ⁹ A hnukhma lahoi tuk hane na kâcai aw h tie Joab ni a thai navah, Isarelnaw thung daw k hoi kahawi kahawi e a rawi teh, Sirianaw tuk hanelah namranlah a tumpup aw h. ¹⁰ Aloukenaw pueng hah a hmaunawng ha Abisai kut daw k koun g a hruek teh, Ammon tami tuk hanelah a tumpup sak aw h.

¹¹ Siria taminaw ni kai na tâ pawiteh, nang-mouh ni na kabawp han. Ammonaw ni nang-manaw na tâ pawiteh, kaimouh ni na kabawp

han. ¹² Tarankahawi lah awm awh. Ka taminaw hoi mamae Cathut khonaw hanelah thapatung aw h nateh, tuk aw h. BAWIPA ni a ngainae patetlah a sak han doeh atipouh.

¹³ Ama koe kaawm e taminaw hoi Siria taminaw tuk hanelah a pátam aw h teh, Sirianaw a yawng aw h. ¹⁴ Sirianaw a yawng aw h e Ammonaw ni a hmu aw h navah, ahnimouh hai Abisai hmalah a yawng aw h teh, kho thung vah a kâen aw h. Joab hai Ammon ram hoi a tâco teh Jerusalem kho lah a cei.

¹⁵ Sirianaw ni Isarelnaw e a hmalah amanaw a sung e a kâpanue aw h navah bout a kamkhueng aw h. ¹⁶ Hadadezer ni tami a patoun teh, tui namran lah kaawm e Sirianaw a thokhai teh, Hadadezer ransa kacue e Shobak ni a hrawi aw h teh, Helam kho lah a cei aw h.

¹⁷ Hote kong Devit koe a dei pouh. Isarelnaw pueng koug a pâkhueng teh, Jordan tui a raka aw h teh, Helam kho a pha aw h. Sirianaw ni Devit tuk hanelah a kampawp aw h teh a tuk aw h. ¹⁸ Sirianaw teh Isarelnaw e hmalah hoi a yawng aw h. Devit ni Siria tami leng daw k kâcuinaw 700 hoi marangransanaw 40,000 touh a thei. Ransabawi Shobak hai a thei aw h teh hawvah a due. ¹⁹ Hadadezer koe san ka toug e siangpahrangnaw pueng teh, Isarelnaw e hmaitung vah amamanaw a sung e a kâpanue aw h navah, Isarelnaw hoi roumnae a sak aw h teh, a thaw a taw k pouh aw h. Hottelah Sirianaw ni Ammonaw hah bout kabawm ngai aw h hoeh toe.

Devit hoi Bathsheba

¹ Kum a kamtawng teh siangpahrangnaw ni tarantuk hanelah a kamthawnae tueng navah Devit ni Joab hah a taminaw hoi Isarelnaw pueng hah a patoun. Ammonnaw a thei awh teh Rabbah kho hai a kalup awh. Hatei, Devit teh Jerusalem kho vah ao.

² Tangminlasa Devit teh a ikhun dawkh hoi a thaw teh, imvan lempu a kâhlai navah, a meikahawi poug e napui tui kamhluk e hah a hmu. ³ Devit ni tami a patoun teh a pacei navah, Eliam canu Hit tami Uriah e a yu Bathsheba doeh atipouh.

⁴ Patounenaw bout a patoun navah, haw e napui hah ahni koe a thokhai awh teh a ikhai. Napui ni a kamthoung hnukkhu a ma im lah a cei. ⁵ Hottelah napui hah camo a vawn. Camo ka vawn telah Devit koe a thai sak. ⁶ Devit ni Joab koevah, Hit tami Uriah hah kai koe tho sak telah lawk a thui teh, Joab ni Uriah teh Devit koe a cei sak. ⁷ Uriah a pha toteh, Joab hoi a taminaw bangtelah a dam awh maw. Tarantuknae koe ahawi ngoun maw telah a pacei. ⁸ Devit ni Uriah koevah, na im lah cet nateh na khok pâsu telah atipouh. Uriah teh siangpahrang im dawkh hoi a tâco teh siangpahrang e canei kawu ni tang a pâlei. ⁹ Hatei, Uriah teh ama im lah cet hoeh, a bawipa e sannaw koe im takhang koevah a i.

¹⁰ Devit koevah, Uriah ama im lah cet hoeh telah a dei pouh awh. Devit ni Uriah koevah kahlawng ceinae koehoi na tho nahohmaw, bangkongmaw nama im vah na cei hoeh telah atipouh.

¹¹ Uriah ni Devit koevah, thingkong, Isarel hoi Judah taminaw rim dawkvah ao awh teh, ka bawipa Joab hoi a sannaw kahrawngum a roe awh navah, kai teh kama im ka cei vaiteh ka canei vaiteh, ka yu koe ka i han na maw. Nang na hring e patetlah na san kai ni khoeroe ka sak mahoeh telah ati.

¹² Devit ni Uriah koevah, Sahnin hai hivah awm nateh tangtho torei na ceisak han telah atipouh. Uriah ni hot hnin a tangtho hnin totouh Jerusalem kho vah ao. ¹³ Devit ni a kaw teh a hmalah a canei teh a parui sak. Tangmin a ma im cet laipalah a sannaw hoi i hanelah a cei.

Uriah a due

¹⁴ Amom vah Devit ni ca a thut teh Joab a patawn, Uriah koe a phu sak. ¹⁵ Ca a patawn e dawkvah, Uriah teh taran apapnae koe hmalah cetsak nateh a thei awh vaiteh a due nahan yawng takhai awh telah ca dawkvah ao.

¹⁶ A dei e patetlah Joab ni kho hah a khet teh a tha ka sai e taran aonaе koe Uriah ao sak.

¹⁷ Khocanaw teh a tâco awh teh Joab hah a tuk awh. Devit e sannaw tangawn a due teh Hit tami Uriah hai a due van.

¹⁸ Joab ni hote kamthangnaw hah Devit koe thaisak hanelah tami a kaw teh, ¹⁹ a patoun e koevah, siangpahrang koe tarankâtuknae naw na dei pouh toteh, ²⁰ siangpahrang teh a lungkhuek, tarantuk hanelah kho hah rek na hnai awh, rapan van hoi na tuk awh han doeh tie na panuek awh hoeh maw. ²¹ Jerubbesheth capa Abimelek hah apinimaw a thei hah. Thebez khovah napui buet touh ni cakang phawmnae a

lû lae talung hoi rapan dawk hoi a pabo sin teh a thei. Bangkongmaw tungdumnae totouh na cei aw h tetpawiteh, na san Hit tami Uriah hai a due telah na dei han telah lawk a thui.

²² Joab ni lawk a thui e patetlah patoune ni Devit koe a dei pouh. ²³ Tarannaw ni kaimanaw atangcalah na tâ aw h. Kahrawngum totouh na pâlei aw h, na tuk aw h. Kaimanaw ni hai kho longkha totouh ka tuk aw h. ²⁴ Tarannaw ni rapan dawk hoi na sannaw na tuk aw h teh, na san a tangawn a due aw h. Na san Hit tami Uriah hai a due telah atipouh.

²⁵ Devit ni hete hno kaawm e daw k na lungpout sak hanh aw h. Kâtuknae koe ouk due phung doeh, thakâlat aw h nateh, puenghoi khopuinaw raphoe aw h telah Joab koe tami a patoun teh lawk a thui.

²⁶ Uriah a due e a yu ni a thai toteh, a vâ hah a khui. ²⁷ A khuinae tueng a pâpout toteh, Devit ni tami a patoun teh hote napui hah a im daw k a kaw teh a yu lah a la. Hote napui ni ca tongpa a khe pouh. Hateiteh, Devit ni a sak e hno ni BAWIPA lunghawi sak hoeh.

12

Devit yon pâphonae

¹ BAWIPA ni Devit koe Nathan hah a patoun. Nathan ni a kêen teh Oe siangpahrang, kho buet touh daw k tami kahni touh ao, buet touh teh ka tawnta e tami, buet touh teh ka roedeng e tami.

² Ka tawnta e ni teh maito hoi tu moikapap a tawn. ³ Ka roedeng e tami teh tulaca buet touh a ran teh a paca e hloilah alouke hno banghai

tawn hoeh. Hote tulaca teh ama hoi a canaw hoi rei ao awh teh a rounng awh. Rawca hai rei a hmawng awh. Tui hai rei a nei awh. A bawipa e a lungtabue dawck kaawm e a canu patetlah doeh ao.

⁴ Ka tawnta e im dawck imyin buet touh a tho teh imyin paca hanelah amae tu hoi maitonaw thei hane a pasai teh ka roedeng e tulaca hah a la teh imyin hanelah a thawng pouh, telah atipouh.

⁵ Devit teh hote tami lathueng puenghoi a lungkhuek teh, Nathan koevah BAWIPA a hring e patetlah hot patetlae hno ka sak e teh a due hane roe doeh. ⁶ Pahrennae tawn laipalah, hot patetlae hno a sak dawkvah, tulaca yueng lah let pali touh hoi patho naseh telah ati.

⁷ Nathan ni Devit koe ahni teh alouke tami nahoeh. Nang hah doeh. Isarel BAWIPA Cathut ni a dei e teh, Isarel siangpahrang lah satui na awi teh Sawl e kut dawck hoi na hlout sak.

⁸ Na bawipa im dawck e râwnaw na coe sak, na bawipa e yunaw hai na lungtabue dawck ka hruek, Isarel imthung hoi Judah imthung hai na poe. Hotnaw hah youn rah pawiteh alouke hno hai na poe sin han rah. ⁹ Nang teh BAWIPA e kâlawk poe e na noutna hoeh. Bangkongmaw ka hmaitung vah kahawihoehe hno na sak. Hit tami Uriah hringnae tahloi hoi na thei teh, a yu hah na lawp. Ammonnaw hoi ahni teh tahloi hoi na thei.

¹⁰ Nang ni kai banglahai na noutna hoeh teh Hit tami Uriah e yu na la dawkvah, na imthungnaw teh tahloi hoi pou a kâhmo awh han toe.

¹¹ BAWIPA ni a dei e teh, na imthung dawck hoi hno kahawihoehe ka tho sak han. Na hmaitung vah na yunaw ka la vaiteh, na imri

hah ka poe vaiteh, kanîthun vah a ikhai aw h han.
¹² Bangkongtetpawiteh, nang ni arulahoi na sak, hatei kai ni Isarelnaw hmaitung kanî hmalah kamnue sak han telah ati.

¹³ Devit ni Nathan koevah, kai ni BAWIPA koe ka payon toe telah ati. Nathan ni Devit koevah, BAWIPA ni hai na yonnae na la pouh toe. Na dout mahoe. ¹⁴ Hateiteh, nang ni hottelah na payonnae lahoi BAWIPA e tarannaw koe dudam nahanelah na poe dawkvah, atu na hmu e na ca hah a due roeroe han telah atipouh. Hahoi Nathan ni a im lah a ban takhai.

Devit capa a due

¹⁵ Uriah e yu ni Devit hanelah a khe pouh e capa hah BAWIPA ni a hem teh ka nut lah a pataw. ¹⁶ Hatdawkvah, Devit ni camo hanelah Cathut koe a kâhei. Rawcahai laihoi karum tuettuet talai daw k a yan. ¹⁷ A imthungnaw daw k e kacuenaw a thaw aw h teh a pathaw aw h hanelah a teng vah a kangdue aw h. Hatei thaw ngai hoeh, ahnimouh koe rawcahai cat hoeh.

¹⁸ Asari hnin vah camo teh a due. Camo a due tie a sannaw ni Devit koe dei ngam aw h hoeh. Bangkongtetpawiteh ahnimouh ni camo a hring nah maimouh ni dei e lawk hah thai han ngai hoeh, camo a due toe telah bangtelamaw maimouh ni dei ngam aw h han. Amahoima runae kâpoe payon vaih telah ati aw h.

¹⁹ Devit ni hottelah a sannaw ni arulaw k duem a dei e a thai navah, camo a due tie Devit ni a panue. Hatdawkvah, Devit ni a sannaw koevah, camo a due toung maw telah ati. Ahnimouh ni oe a due toe telah atipouh aw h. ²⁰ Devit teh talai

dawk hoi a thaw teh hak a kâpasu teh satui a kâhluk, a khohna a kâpahoung teh BAWIPA e im lah a cei teh a bawk. A im lah bout a ban teh bu ca hane a hei navah, a sannaw ni a rakueng pouh awh teh a ca.

²¹ A sannaw ni na hno na sak e hah bangmaw, camo a hring navah rawca nahai teh na khuika, hatei camo a due toteh na thaw teh rawca na ca telah atipouh awh.

²² Devit ni Oe, camo a hring navah rawca kahai teh ka ka, camo heh a hring thai nahan BAWIPA ni a pahren talang teh tie apinimaw a dei thai han ka ti dawk doeh. ²³ Atuteh camo a due toe, bangkongmaw rawca kahai han vaw, bout ka hring sak thai han na maw. Ahni koe kai ka cei han, ahni teh kai koe bout ban mahoe toe telah ati.

Solomon a khe

²⁴ Devit ni a yu Bathsheba hah a lung a pahawi. Ahni koe a kâen teh a ikhai. Ahni ni ca tongpa buet touh a khe teh Solomon telah min a phung. Ahni teh BAWIPA ni a lung a pataw. ²⁵ Profet Nathan hah a patoun teh camo e min teh BAWIPA e Jedidiah telah min a phung.

Rabbah kho a la

²⁶ Joab ni Ammon ram Rabbah kho hah a tuk teh khopui hah a la. ²⁷ Joab ni Devit koe patounenaw a patoun teh kai ni Rabbah kho ka tuk, tui kapoekung khopui hah ka la. ²⁸ Atuvah, ka cawi rae taminaw pâkhueng awh, khopui teng tumpup awh nateh tuk awh nateh lat awh. Khopui ka la vaiteh kama e ka min lahoi ka kaw han telah ati.

²⁹ Dedit ni tami pueng a pâkhueng teh Rabbah vah a cei awh, a tuk awh teh a la awh. ³⁰ Hahoi ahnimaie siangpahrangnaw e bawilakhung a kâ muk e a la pouh awh. Sui talen buet touh a ri, aphukaawm e talung hai ao. Dedit a kâ muk sak awh. Kho thung e hno moi a lawp awh. ³¹ Kho thung e khocanaw a tâco sak awh teh, hlaw hoi sumtaboung hoi cakâ hoi thaw a tawk sak awh teh, amhru hai a sak sak awh. Ammonnaw e khopuinaw hah hottelah a sak awh. Dedit hoi a taminaw pueng Jerusalem kho lah a ban awh.

13

Amnon hoi Tamar

¹ Dedit e capa Absalom ni a tawncanu a meikahawi poung e buet touh a tawn. A min teh Tamar doeh. Dedit e a capa Amnon ni ahni hah a ngai. ² Amnon teh Tamar a ngai lawi a takpatawkhai. Ahni teh tanglakacuem doeh. Ahni koevah bangpatet e hno a sak e hai Amnon hanelah coung thai hoeh. ³ Hatei, Amnon ni hui a tawn, a min teh Jonadab doeh. Ahni teh Dedit e hmau Shimeah capa doeh. Jonadab teh huenghai kaawm e lah ao. ⁴ Nang teh siangpahrang e capa lah na o eiteh, hnin touh hnukkhu hnin touh bangkongmaw na kamsoe. Kai koe na dei ngai han na ou telah atipouh. Amnon ni ka nawngaha Absalom e a tawncanu Tamar ka lungpataw lawi doeh telah atipouh.

⁵ Jonadab ni vah, na ikhun daw k ka pataw lah kâsak loe. Na pa ni na khet navah, ka tawncanu kai koe tho naseh. Vaiyei ka ca hane na poe naseh. Ahni ni a thawng e cakawi kai ni ka hmu

vaiteh, a kut dawk e ka ca hanelah ka hmalah thawng naseh na ti pouh han telah pouknae a poe.

⁶ Amnon teh pataw lah a kâsak teh a yan. Siangpahrang ni a khet navah Amnon ni siangpahrang koevah, pahren lahoi ka tawncanu hi tho sak nateh ka hmaitung vah vaiyei a phen kahni tabang na sak pouh seh, a kut dawk e ka ca han telah atipouh.

⁷ Devit ni Tamar koevah, na thangroi Amnon im vah cet nateh, ca hane kawî thawng pouh telah tami a patoun.

⁸ Tamar teh Amnon im a cei. Ahni teh ikhun dawk a yan. A kanawk e vaiyei hah a hmaitung vah a karê. ⁹ Ailo dawk hoi a sin teh a hmalah a pâtoum pouh. Hatei cat pouh ngai hoeh. Amnon ni taminaw be tâcawt sak ei telah ati dawkvah taminaw teh a tâco awh. ¹⁰ Amnon ni Tamar koevah, na kut dawk e ka ca hanelah ikhun koe thokhai telah atipouh. Tamar ni vaiyei phen a sin teh a thangroi Amnon e irakhan thung a ceikhai. ¹¹ Amnon ca hanelah a sin pouh navah a kut a kuet pouh teh ka tawncanu kai hoi ip roi sei atipouh.

¹² Tamar ni telah nahoeh ka thangroi, kai hah na pacekpahlek hanh. Isarel miphun dawk het patet e hno sak kawî nahoeh. Kahawihoeh e hno sak hanh. ¹³ Na sak pawiteh kayanae koehoi bangtelamaw hlout thai han vaw. Nang hai Isarel miphunnaw dawk tamipathu lah doeh na awm ti. Hatdawkvah, siangpahrang koe dei pouh. Kangek mahoeh mue telah atipouh.

14 Hatei, ahni ni a lawk ngai pouh hoeh, a tawncanu hlak a tha ao dawkvah a tapam teh a ikhai.

15 Hahoi, Amnon ni a tawncanu hah bout a hmuhma, ahmaloe a lungpatawnae hlak a hmuhmanae hoe a len. Amnon ni thaw nateh cet leih atipouh.

16 A tawncanu ni vah telah nahoe. Het patetlah hrumhram na hrek e kai na yonkhai e hlak atu na hrek e doeh yonnae hoe kalen telah ati. Amnon ni noutna pouh hoeh.

17 A san buet touh a kaw teh, hete napui heh pâlei leih. Tho taren sin haw atipouh.

18 Tanglakacuem siangpahrang canu ni ouk a khohna e patetlah a em kaawm e angkidung a kho. A san ni a hrek teh tho king a taren sin.

19 Tamar ni hraba a kâphuen teh a hni ka dung a em kaawm e koung a phi. A lû daw k a kut a toung teh a cei laihoi pueng hoi a khuika.

20 A thangroi Absalom ni, na hmau Amnon ni na pacekpahlek na maw. Lawkkamuem lah awmh. Ahni teh na thangroi doeh. Hete hni heh na lungthung vah thouk pouk hanh, telah atipouh. Hottelah Tamar teh a thangroi Absalom im vah, oru laihoi ao.

Absalom ni Amnon a thei

21 Hateiteh, siangpahrang Devit niteh, hote hno a thai navah, a lung puenghoi a khuek.

22 Absalom ni a hmaunawnggha Amnon koe banghai dei hane ngai hoeh. A tawncanu a pacekpahlek dawkvah, Absalom ni Amnon a maithoe.

²³ Kum hni touh a kuep hnukkhu Absalom teh Ephraim kho teng Baalhazor kho hoi, tu muen ngaw saknae paw i koe siangpahrang e canaw pueng a coun. ²⁴ Absalom teh siangpahrang koe a cei teh, na san ni tu muen a ngaw pouh. Na sannaw kaw nateh, ka sannaw koe nama hoi rei cet aw h telah atipouh.

²⁵ Siangpahrang ni Absalom koevah, telah nahoe h, ka capa abuemlahoi he ka cet aw h mahoe h. Bangkongtetpawiteh, hmuenri phu lah aw m payon vai h telah ati. Absalom ni a coun eiteh, cet ngai hoe h. Yawhawinae hah a poe. ²⁶ Absalom ni hottelah pawiteh, ka nawng ha Amnon hateh kaimouh koe tho van seh telah atipouh navah, siangpahrang ni bangkongmaw khuet a cei han telah atipouh.

²⁷ Hateiteh, Absalom ni Amnon hoi siangpahrang e a canaw hah cei hanelah bout a coun. ²⁸ Absalom ni a sannaw hah khenhaw! Amnon teh misurtui nei hoi a nawm lahun navah, Amnon hah thet aw h ka ti navah na thei aw h han. Taket aw h hanh. Kâ na poe aw h toe nahoe hmaw. Tarankahawilah aw m aw h telah lawk a thui.

²⁹ Hottelah Absalom e a sannaw ni Amnon daw k Absalom ni kâ a poe e patetlah a sak aw h. Siangpahrang e a canaw a thaw aw h teh amamae la daw k lengkaleng a kâcui aw h teh a yawng aw h.

³⁰ Ahnimanaw a pha hoe hnahlan, aloukenaw a tho aw h teh, Absalom ni, siangpahrang e a canaw he a thei toe, buet touh hai hlung hoe h telah Dedit koe a thaisak aw h.

³¹ Siangpahrang ni a thaw teh, a hni hah a ravei teh talai dawk a kamlei. A sannaw ni hai a hni a ravei awh teh a teng vah a kangdue awh.

³² Devit e a hmau Shimeah capa Jonadab ni, ka bawipa ni siangpahrang e a canaw heh a thei tie yuem hanh naseh. Bangkongtetpawiteh, kadout e teh Amnon dueng doeh. A tawncanu Tamar pacekpahleknæ koehoi hete hno heh Absalom ni kâ a poe e patetlah sut pouk e lah ao toe. ³³ Hatdawkvah, ka bawipa siangpahrang e a canaw heh a due telah pouk hanh naseh. Bangkongtetpawiteh, kadout e teh Amnon dueng doeh telah a ti. ³⁴ Absalom teh a yawng. Ramveng ni a radoung teh a khet nah, ahnie a hnuklah monhleple lae lam dawk ka cet e tami moikapap a hmu. ³⁵ Jonadab ni siangpahrang capanaw a tho toe, na san ni a dei e patetlah doeh ao telah atipouh.

³⁶ Siangpahrang e a canaw teh a tho awh teh kacaipounglah a ka awh. Siangpahrang hai a sannaw hoi kacaipoung a khuika awh.

³⁷ Hatei Absalom a yawng teh Geshur siangpahrang Ammihud capa Talmai koelah a cei. Devit ni hnintangkuem a capa hah a khui. ³⁸ Absalom teh Geshur koelah a yawng teh kum thum touh hawvah ao. ³⁹ Hahoi siangpahrang Devit ni Absalom koe cei hanelah dikdik a doun. Amnon due e dawk te, a lung yo a kâpahawi toe.

14

Jerusalem lah Absalom teh a ban

¹ Zeruah capa Joab ni siangpahrang e lungthin teh Absalom koe ao tie a panue. ² Joab ni Tekoa kho dawak tami a patoun. Haw e napui a lungkaang poun e hah a ma koe a kaw teh, lungkamathout e patetlah na o pouh han. Ro hni hah kâkhu nateh, satui hai kâhluk hanh. Ro koe atueng moikasawlah ka kap e napui patetlah na o pouh han. ³ Siangpahrang koe na cei vaiteh ahni koe hettelah na dei pouh han telah ati. Hottelah Joab ni a cangkhai teh a pâtu.

⁴ Tekoa kho e napui ni siangpahrang koe lawk a dei nah talai dawak minhmai kâbet lah a tabo. Oe siangpahrang na kabawm loe telah a ti. ⁵ Siangpahrang ni napui koevah, bangpatet lae runae maw na tawn telah ati. Napui ni ka vâ a due toe. ⁶ Na sannu koe capa kahni touh ao. Hote capa roi teh law vah a kâhmak roi teh katarakung ao hoeh dawkvah, buet touh e ni buet touh e hah a thei. ⁷ A imthungnaw ni na sannu hah a tuk awh. Ka hmaunawngka kâthetkung ka thei thai nahan na poe awh haw. Râw kapangkung hai ka thei awh han telah ati. Hottelah tet awh pawiteh, kai dawak ka cawi rae hmaisaan ahnimouh ni a padue awh han doeh. Ka vâ e min thoseh, ca catoun awm laipalah talai dawak hoi koun a thei awh han doeh telah atipouh.

⁸ Siangpahrang ni napui koevah, nama im lah cet lawih. Nange kong dawak kai ni ka dei han telah a ti.

⁹ Tekoa kho e napui ni siangpahrang koevah, oe siangpahrang ka bawipa, hete yonnae phu

teh, kai hoi apa imthung koe bawt naseh. Siangpahrang hoi a bawitungkhung ni yon phawt hanh naseh telah a ti.

¹⁰ Siangpahrang ni nange kong dawk yon na ka pen e pueng hi tho sak, a rucatnae bout na poe aw h mahoe h toe telah atipouh.

¹¹ Napui ni thi ka palawng naw koe kaie ka canaw a thei aw h hane ka ngaihri dawkvah, ahnimouh ni a thei hoeh nahan, siangpahrang na BAWIPA Cathut teh, pahnim roeroe hanh naseh. Nahoe h pawiteh, ka capa a thei payon aw h han telah ati. Ahni ni BAWIPA a hring e patetlah na capa e samrui buet touh boehai talai daw k bawt mahoe h telah atipouh.

¹² Hatdawkvah napui ni, na sannu ni ka bawipa siangpahrang koe lawk kam touh bout dei naseh telah ati. Ahni ni dei loe atipouh.

¹³ Napui ni hai telah pawiteh, bangkongmaw Cathut e taminaw koe tarannae lahoi hettelah sak hane na kâcai. Siangpahrang ni a hrek e tami bout a kaw hoeh dawkvah, siangpahrang ni yon a pen tinae doeh. ¹⁴ Bangkongtetpawiteh, abuemlahoi he due aw h han. Talai daw k tui rabaw k e bout duek thai hoeh e patetlah doeh o aw h. Cathut teh tami minhmai a khet ei nakunghai, pâlei lah kaawm e tami teh, ama koehoi pou pâlei e lah kaawm e nahoe h.

¹⁵ Hatdawkvah siangpahrang ka bawipa koe vah, hete lawk dei hane ka thonae hai tami ka taki daw k doeh. Na sannu ni siangpahrang koe vah dei haw khe, ka kâhei e patetlah siangpahrang ni a kuep sak han doeh. ¹⁶ Siangpahrang ni kai hoi ka capa heh Cathut e râw coe hoeh

nahanlah thei hanelah kakâcainaw thung hoi na sannu heh na rungngang hanelah na thai pouh han doeh telah ka ti. ¹⁷ Na sannu ni siangpahrang ka bawipa e lawk teh, hnâroumnae lah awm seh. A thoe hoi hawi kapek nahanelah siangpahrang ka bawipa teh, Cathut e kalvantami patetlah doeh ao. BAWIPA Cathut teh nang koe awm naseh ka ti, telah a ti.

¹⁸ Siangpahrang ni napui koevah, kai ni na pacei e pueng banghai hrawk hanh telah ati. Napui ni siangpahrang ka bawipa dei yawkaw telah atipouh.

¹⁹ Hot patetlah siangpahrang ni hete kong dawkvah, Joab hai a bawk maw telah ati. Napui ni siangpahrang ka bawipa na hring e patetlah siangpahrang ka bawipa ni a dei tangcoung e teh aranglah thoseh, avoilah thoseh apinihai roun thai mahoe. Bangkongtetpawiteh, na san Joab ni na patoun teh hete lawk pueng na sannu na cangkhai e doeh. ²⁰ Na dum vaiteh, hettelah kâsak hanelah na san Joab ni a sak e doeh. Ka bawipa teh talai daw k hno kaawm e pueng panuethainae Cathut kalvantami patetlah a lungkaang e doeh telah atipouh.

²¹ Siangpahrang ni Joab koevah, bokheiyah hete lawk kai ni ka dei han. Cet nateh thoundoun Absalom hah thokhai haw telah atipouh.

²² Joab teh talai daw k minhmai kâbet lahoi a tabo hnukkhu, siangpahrang koe lunghawi lawk a dei. Joab ni Oe siangpahrang ka bawipa ni, na san ni ka kâhei e patetlah minhmai kahawi na hmaitung vah ka hmu e ka lung a kuep e ka panue telah atipouh.

²³ Joab teh a thaw teh Geshur kho lah a cei teh, Absalom hah Jerusalem kho lah a thokhai. ²⁴ Siangpahrang ni a ma im cet naseh, ka mei hmawt hanh naseh telah ati. A dei e patetlah Absalom ni a im lah a cei teh siangpahrang e minhmai hmawt hoeh.

Devit ni Absalom a ngaithoum

²⁵ Isarelnaw thung dawk Absalom patetlae a meikahawi, oup e lah kaawm e apihai awm hoeh. Khoktabei koehoi a lû totouh toun kawî buet touh hai awm hoeh. ²⁶ A sam a ngaw navah, siangpahrang e yawcu dawk a khing navah kum touh dawk shekel 200 touh a pha.

²⁷ Absalom ni ca tongpa 3 touh hoi, a canu Tamar a min phung e a tawn. A canu teh a meilam hroung ahawi. ²⁸ Absalom ni siangpahrang e a minhmai hmawt laipalah kum 2 touh thung Jerusalem kho vah ao hnukkhu, ²⁹ Joab hah siangpahrang koe a patoun hanelah lawk a thui. Hateiteh, thao han ngai hoeh. Apâhni lawk bout a thui, tho han bout ngai hoeh. ³⁰ A sannaw koevah, khenhaw! Joab e law teh kaie law e a teng ca doeh ao. Catun hah cet aw h nateh, hmaisawi pouh aw h telah atipouh. Hottelahoî Absalom e a sannaw ni law teh hmai a sawi pouh aw h.

³¹ Joab ni Absalom koe a cei teh na sannaw ni kaie law bangkongmaw hmai a sawi aw h telah a pacei. ³² Absalom ni Joab koevah, bangkongmaw Geshur hoi ka tho. Haw e kho daw k pou kaawm pawiteh kai hane kahawi hane eiteh telah siangpahrang koe na patoun hanelah lawk na thui. Hatdawkvah, atuvah siangpahrang e

mei na hmawt sak haw. Kai dawk yonnae awm pawiteh, ahni ni na thet yawkaw naseh, telah a dei pouh.

³³ Joab ni siangpahrang koe a cei teh a dei pouh. Absalom hah a kaw teh siangpahrang koe a cei teh siangpahrang hmalah talai dawkkêbet lahoi a lûsaling teh a tabo. Siangpahrang ni Absalom teh a tapam teh a paco

15

Absalom taranthawnae

¹ Hathnukkhu hoi Absalom ni lengnaw hoi marangnaw hoi amae hmalah ka cet hane tami 50 touh a rakueng. ² Absalom teh amom a thaw teh, longkha koe ouk a kangdue. Siangpahrang koe rucat kâhmo e dei han ka tawn e pueng hah, Absalom ni a kaw teh api kho maw ouk atipouh. Ahnimanaw ni Isarel miphun thung e doeh ouk atipouh awh.

³ Absalom ni ahni koevah na lawk dei e naw teh atang doeh. Hatei, nange kong ka dei hane siangpahrang hoi apinihai thai mahoech telah ouk atipouh.

⁴ Kai teh hete ram dawkkcengkung siangpahrang lah na sak awh haw pawiteh, lawk dei hane ka tawn e pueng kai koe a tho awh vaiteh, kalancalah kai ni lawk ka ceng pouh han telah ouk atipouh.

⁵ Tami buetbuet touh barilawa lahoi a tho nah, Absalom ni a kut a dâw laihoi a kuet teh ouk a paco ⁶ Isarel siangpahrang koevah lawk dei hane ka tho pueng koe, Absalom ni hottelah ouk a sak.

Hottelah Absalom ni Isarelnaw e a lungthin a paru pouh.

⁷ Kum pali touh aloum hnukkhu, Absalom ni siangpahrang koevah, Hebron kho vah BAW-IPA koe e ka lawkkam a kuep nahan ka cei sak. ⁸ Bangkongtetpawiteh, na san ni Siria ram Geshur kho ka o navah, BAWIPA ni Jerusalem kho bout na cetsak pawiteh, BAWIPA e thaw ka tawk han telah lawk ka kam toe telah a ti.

⁹ Siangpahrang ni karoumcalah cet atipouh. Hat navah, Absalom ni a thaw teh, Hebron lah a cei.

¹⁰ Absalom ni mongka lawk na thai awh tahma, Absalom teh Hebron kho dawk siangpahrang doeh telah na hram awh han telah Isarel miphun pueng koe arulahi katuetnaw a patoun.

¹¹ Absalom ni a kaw e tami 200 touh e Jerusalem kho thung hoi a cei van awh. A lung kathoungpincalah banghai panuenae awm laipalah a cei awh. ¹² Devit e lawkcengkung Giloh koe e Ahithophel teh ama onae Giloh kho dawk, thuengnae a sak navah Absalom a kaw. Absalom hnukkâbangnaw teh tami moi a pap teh kâtarannae hoe a len.

¹³ Patoune buet touh Devit koe a tho teh, Isarelnaw e lungthin teh, Absalom koelah koug a kamlang toe telah atipouh.

¹⁴ Devit ni maimanaw thaw awh vaiteh, yawng awh leih sei. Yawng hoehpawiteh Absalom kut daw k hoi hlout awh mahoe h toe. Karanglah cet awh sei. Hottelah nahoe h pawiteh, ahni ni tang na tuk awh vaiteh, maimae lathueng runae phatsak awh vaiteh, khopui hah tahloi hoi a

tuk awh han doeh telah Jerusalem kho ama koe kaawm e sannaw koe a dei pouh.

¹⁵ Siangpahrang e sannaw ni, siangpahrang nang ni na dei e pueng ka sannaw ni sak hanelah coungkacoe ka o awh han telah ati awh. ¹⁶ Hahoi siangpahrang teh a imthungnaw hoi a cei awh. a im a ring sak hanelah a yudonaw 10 touh a hruek. ¹⁷ Siangpahrang a tâco teh taminaw ni a hnukkâbang awh teh, im a poutnae koe a kâhat awh. ¹⁸ A taminaw ni a yawngtahrei awh. Kerethnaw, Pelethnaw, Gitnaw, Gath kho e hoi a hnukkâbangnaw 600 touh teh, siangpahrang e hmalah a cei awh.

¹⁹ Siangpahrang ni Git tami Itai koevah bangkongmaw kaimouh koe na kâbang. Ban nateh siangpahrang koe awmh. Nang teh mipun louk doeh. Hatdawkvah na onae koe lah ban lawih. ²⁰ Paduem tangmin doeh nueng na tho. Kaimouh koe avoivang lah na cei han namaw. Nâ lah maw ka cei han tie ka panuek hoeh. Ban lawih, na hmaunawngghanaw kaw nateh ban leih. Pahrennae hoi yuemkamcunae teh nang koevah awm seh telah atipouh.

²¹ Itai ni siangpahrang koe, BAWIPA hoi siangpahrang a hring e patetlah siangpahrang ka bawipa na onae pueng koe na san heh, due hai due, hring hai hring pou ao han doeh telah atipouh.

²² Devit ni Itai koe, cet awh nateh pou cet awh, telah ati. Hottelah Git tami Itai teh a taminaw hoi a canaw hoi pou a cei awh. ²³ Khocanaw teh puenghoi a khuika awh. A hnukkâbangnaw ni a cei awh teh, siangpahrang ama roeroe ni Kidron

palang a raka teh taminaw pueng ni hai a raka awh teh, kahrawng lam koelah hoi a cei awh.

²⁴ Zadok hoi Levihnaw pueng Cathut e thingkong a kâyawt laihoi thingkong a patue awh. Taminaw ni kho a tâco takhai hoehroukrak Abiathar teh thuengnae a sak. ²⁵ Siangpahrang ni Zadok koevah, Cathut e thingkong teh khopui thung bout bankhai awh. BAWIPA hmalah minhmai kahawi ka hmawt pawiteh, na bankhai awh vaiteh, Cathut e thingkong hoi a onae bout ka hmu han. ²⁶ Hateiteh, nang dawkvah lunghawinae khoeroe ka tawn hoeh tetpawiteh, kai hi ka o, ahawi ati e patetlah kai dawk sak naseh telah a ti.

²⁷ Siangpahrang ni vaihma Zadok koe hai, nang teh kahmawtkung nahoehmaw, na capa Ahimaaz hoi Abiathar e capa Jonathan hai kaw nateh khopui thung ban awh.

²⁸ Nangmanaw ni na thaisak hoehroukrak, kai ni kahrawngum e ayawn koe na ring awh han telah a ti. ²⁹ Zadok hoi Abiathar ni Cathut e thingkong hah Jerusalem kho a ceikhai awh teh hawvah ao awh.

³⁰ Devit teh a khuika laihoi a lû a ramuk teh, a khokkhawm a rading teh khok caici lahoi Olive Mon dawk a takhang. A hnukkâbang e pueng ni a lû a ramuk awh teh, khuika laihoi a takhang awh.

³¹ Absalom koelah kambawngnaw thung dawk, Ahithophel hai a bawk van telah Devit koe a dei pouh awh. Devit ni Oe BAWIPA, Ahithophel ni pouknae a poe e hah pathunae lah coung sak haw telah a kâhei. ³² Mon koe a pha toteh Devit

ni Cathut a bawk. Arki tami Hushai ni hai angki a ravei teh a lû dawk vaiphu a kâphuen laihoi ama kâhmo hanelah a tho.

³³ Devit ni kai koe na cet van pawiteh, kai na tarawk han doeh. ³⁴ Khopui koelah na ban vaiteh, Absalom koevah Oe bawipa kai teh nang koe san lah ka o han. Na pa koe san lah ouk ka o e patetlah atu na san lah ka o han na tetpawiteh, Ahithophel khopouknae ka ngang pouh kung lah doeh let na awm tih. ³⁵ Haw vah vaihma Zadok hoi Abiathar hai ao nahoehmaw. Hatdawkvah siangpahrang im e lawk na thai e pueng hah vaihmanaw koe bout na dei han. ³⁶ Zadok capa Ahimaaz hoi Abiathar capa Jonathan capa kahni touh ao. Na thai e pueng bout na thaisak nahanelah, ahnimanaw kai koe pou na patoun han telah atipouh.

³⁷ Devit e a hui Hushai teh kho thung vah a cei. Absalom hai Jerusalem kho koelah a pha.

16

Ziba ni Devit a kabawp

¹ Devit ni monsom kuet a tapoung navah, Mephibosheth e a san Ziba ni a dawn nahan la kahni touh a rakueng. Vaiyei tueng 200, misur bom ka ke e 100, thaibunglung paw 100, touh hoi misur um buet touh la dawk a phu sak.

² Siangpahrang ni Ziba koevah, bangtelah na sak hane maw hete hno heh na sin atipouh. Ziba ni la heh siangpahrang imthung a kâcui nahane, vaiyei hoi a pawnaw teh thoundounnaw ni a ca hane, misurtui hai kahrawngum a tha katawnnaw ni a nei hane doeh telah atipouh.

³ Siangpahrang ni na bawipa e capa hah namaw ao telah a pacei. Ziba ni Jerusalem kho dawk ao. Sahnin vah Isarelnaw ni apa e uknae hah na poe han telah ati doeh na a telah atipouh.

⁴ Siangpahrang ni Ziba koe vah Mephibosheth ni a tawn e hno pueng nange lah ao toe telah atipouh. Ziba ni na hmalah kârahnoum laihoi ka tho. Oe siangpahrang ka bawipa, na minhmai kahawi ka hmu thai nahan pou kâyawm han telah atipouh.

Shimei ni Devit thoe a bo

⁵ Devit siangpahrang teh Bahurim kho a pha toteh, Sawl imthung Gera capa a min Shimei teh thoebo laihoi a tho. ⁶ Devit hoi siangpahrang e a sannaw hah talung hoi a dêi aw. Taminaw hoi athakaawme taminaw teh avoilah aranglah ao aw. ⁷ Shimei ni thoebo nalaihoi cet leih khe, cet leih khe, nange thi ka palawng e hoi tamikayon, ⁸ Sawl e a uknae a la teh, Sawl imthung e a thi paling nange na lû dawk BAWIPA ni a pha sak teh, a uknaeram teh na capa Absalom a poe toe. Thi ka palawng e lah na o dawkvah, namahoima runae na kâpoe e doeh telah atipouh.

⁹ Zeruah capa Abishai ni siangpahrang koe-vah, bangkongmaw ui ro ni ka bawipa thoe a bo. A lû ka tâtueng pouh han telah atipouh.

¹⁰ Siangpahrang ni nangmouh Zeruah capanaw, nangmanaw hoi kai teh bangpuibangpa nahoe. BAWIPA ni Devit hah thoebo lah awm-seh, telah ahni koe lawk thui pawiteh thoebo yawkaw naseh. Hatdawkvah, bangkongmaw hettelah na sak telah apinihai tet pouh mahoe. toe.

¹¹ Devit ni Abishai hoi a sannaw koe, ka thung hoi ka tâcawt e ka capa ni, thei hanelah na nong pawiteh, Benjamin miphunnaw ni hohtlak thei han na nong han doeh. Bangtelah hai tet awh hanh. Thoe na bo yawkaw naseh. BAWIPA ni a sak sak e doeh. ¹² BAWIPA ni ka rucatnae a hmu vaiteh, ahni ni thoe na bo e heh ahawinae koe lahoi BAWIPA ni na pathung e lahai ao han telah Abishai hoi a sannaw koe a dei pouh.

¹³ Devit hoi a taminaw teh lam daw koe a cei awh lahun navah, Shimei teh Devit hoi phekkadangka lah mon langboun g a cei teh, thoebo nalai-hoi talung hoi a dei teh, vaiphu a kahei sin.

¹⁴ Siangpahrang hoi a hnukkâbangnaw teh a tawn poung awh. Jordan tui koe a pha awh teh a kâhat awh.

Ahithophel ni pouknae a poe

¹⁵ Absalom hoi a taminaw pueng Jerusalem kho a pha awh teh, ahni koe Ahithophel hah ao.

¹⁶ Devit e a hui Arki tami Hushai teh Absalom koe a pha toteh, Hushai ni Absalom koevah, siangpahrang na hring saw naseh, siangpahrang na hring saw naseh telah yawhawinae a poe.

¹⁷ Absalom ni Hushai koevah, hettelamaw na hui na lungpataw, bangkongmaw na hui koe na cei hoeh telah ati.

¹⁸ Hushai ni Absalom koevah, ka cet mahoeh, Cathut ama hoi ahnimouh Isarelnaw ni a rawi awh e koe a san lah ka o han, ahni koe ka o han atipouh. ¹⁹ Apie thaw maw ka taw k han. A capa koe thaw ka taw k han nahoehmaw. Na pa e hmalah thaw ka taw k e patetlah nange hmalah ka taw k han telah atipouh.

²⁰ Absalom ni Ahithophel koe bangtelamaw ka sak han, pouknae na poe haw telah atipouh.

²¹ Ahithophel ni na pa e a yudo im karingkung-naw a ta e naw koe kâen sin. Isarelnaw ni na pa ni na maithoe tie panuek awh vaiteh, nang koe kaawm e naw e kut teh a tha a sai awh han atipouh.

²² Hottelah imvan vah Absalom hanelah rim a sak pouh awh. Hottelah Isarelnaw e a hmaitung vah, a na pa e yudonaw koe a kâen. ²³ Hatnae tueng nah Ahithophel ni pouknae a poe e teh, Cathut lawk patetlah ouk pouk pouh e lah ao. Hot patetlah Ahithophel ni Devit hoi Absalom pouknae a poe e pueng teh, pouk pouh e lah ao.

17

Hushai ni Devit a pahnawt

¹ Ahithophel ni Absalom koevah, tami 12, 000 rawi naseh. Sahnin tangmin ka thaw vaiteh Devit ka pâlei han. ² A tha a tawn teh a kut tha a youn navah, ka tuk vaiteh, a lung ka puen sak han. Ahni koe kaawm e pueng hah a yawng awh vaiteh, siangpahrang dueng hah ka thei han. ³ Taminaw pueng nang koe ka thokhai han na tawng e teh tami pueng hoi a kâvan han. Tami pueng bout a ban awh vaiteh, karoumcacah ao awh han telah ati.

⁴ Hote lawk hah Absalom hoi Isarelnaw mi-phun kacuenaw ni a ngai awh. ⁵ Absalom ni Arki tami Hushai hai kaw haw, a dei e hah maimouh ni thai pouh haw sei telah ati. ⁶ Hushai ni Absalom koe a pha toteh, Absalom ni Ahithophel ni hettelah a dei. A dei e patetlah sak han na

maw, sak awh mahoe h maw. Nahoe h pawite h, nang hai dei van haw telah atipou h.

⁷ Hushai ni Absalom koe a pha tote h, Absalom ni Ahithophel ni pouknae a thokhai e he h hawi hoeh.

⁸ Hushai ni, na pa hoi a taminaw teh na panue toe. Athakaawme tami, ka matheng katang e tavom manu a ca la pou h e patetlah, doeh ao awh. Hahoi, na pa teh taran ka tuk e lah ao teh, taminaw koe roe mahoe h. ⁹ Khenhaw! atuvah, lungngoum buetbuet tou h koe a kâhro han doeh. Nahoe h pawite h, alouke hmuen koe a kâhro han doeh. Tami tangawn ahmaloe la rawm lah dout awh pawite h, hote kamthang ka thai e ni Absalom hnukkâbangnaw teh, a due awh toe telah a dei awh han. ¹⁰ Tarankahawi e tami, sendek e lungthin ka tawn e patenghai a lung a pout han. Bangkongtetpawite h, Isarelnaw pueng ni na pa teh athakaawme hoi ama koe kaawm e naw teh tami a thakasai e seng doeh tie hah a panue awh. ¹¹ Hatdawkvah pouknae na poe han ka ngai e teh, Dan kho hoi Beersheba kho totou h, Isarelnaw teh tuipui teng e sadi yit tou h nang koe a kamkhueng awh teh, nangmanaw hai tarantuknae koe cet van awh nate h, ¹² hottelah kâhmo thainae a hmuen pueng koe, talai daw k tadamtui ka baw t e patetlah muen na ramuk awh vaite h, ama hoi ahni koe kaawm pueng buet tou h hai pâhlung awh mahoe h. ¹³ Hothloilah, khopui buet tou h koe kâen pawite h, Isarelnaw pueng ni tangron sin vaite h hote kho daw k cei awh vaite h, talungcanaw buet tou h boehai ao hoeh totou h, palang vah koung sawn awh han

telah ati. ¹⁴ Absalom hoi Isarelnaw ni Arki tami Hushai ni pouknae a poe e teh Ahithophel ni pouknae a poe e hlak ahawi telah ati awh. Bangkongtetpawiteh, BAWIPA ni Absalom e lathueng runae a pha sak thai nahan BAWIPA ni kahawipoung e Ahithophel pouknae a poe e a tapuet sak han a ngai dawk doeh.

Hushai ni Devit yawng hanelah kâhruetcuetnae a poe

¹⁵ Hushai ni vaihma Zadok hoi Abiathar kovah, hottelah Ahithophel ni Absalom hoi Isarelnaw hah pouknae a poe, hahoi kai ni hai pouknae hot patetlah ka poe toe telah ati. ¹⁶ Hatdawkvah, atu tangmin vah, kahrawngum ayawn dawk roe laipalah, pou cet awh. Nahoe pawiteh, siangpahrang hoi a taminaw pueng teh koung a thei payon awh han doeh telah Devit koe karanglah dei pouh awh telah ati.

¹⁷ Jonathan hoi Ahimaaz teh Enrogel vah ao awh teh, sannu buet touh ni ahnimouh koe ouk a dei pouh teh, ahnimouh ni Devit koe patuen ouk a dei pouh awh. Bangkongtetpawiteh, khopui thung kâen e hah apinihai hmu hanelah awm hoeh. ¹⁸ Hatei, camo ni a hmu awh teh, Absalom koe a dei pouh. Hottelah kahni touh hoi vai touh lahoi a yawng roi. Bahurim tami buet touh thongma dawk tuikhu ka tawn e im dawk a kâen roi teh tuikhu dawk a kâhro roi. ¹⁹ Hahoi, a yu ni tuikhu teh a khuem hoi a khuem teh cakang muen a vaw sin dawkvah apinihai panuek hoeh.

²⁰ Absalom e a sannaw hote im koe a pha awh navah, Ahimaaz hoi Jonathan hah namaw ao roi telah napui koe a pacei awh. Napui ni, palang

namran lah yo a pha han doeh toe telah atipouh. Ahnimouh ni a tawng awh teh hmawt awh hoeh toe. Hateh Jerusalem lah a ban awh.

²¹ Hahoi, a ban awh hnukkhu, Ahimaaz hoi Jonathan teh tuikhu dawkh hoi a tâco roi teh, Devit siangpahrang koe a dei pouh roi. Devit koevah thaw awh nateh karanglah cet awh leih. Bangkongtetpawiteh, hettelah Ahithophel ni nang na taranlahoi pouknae a poe telah atipouh.

²² Devit hoi ama koe kaawm e pueng a thaw awh teh, Jordan tui a raka awh. Khodai nah be a raka awh toe. Ka rakat hoeh e tami buet touh hai awm hoeh. ²³ Ahithophel ni pouknae a poe e hah tarawi awh hoeh tie a thai awh toteh, la a rakueng awh teh ama kho lah a cei awh. A imthungnaw kho a saknae kong kahawicalah cing a thui hnukkhu a kaithi. A mintoenaw e phuen koe a pakawp awh.

²⁴ Devit ni Mahanaim kho koe a pha navah, Absalom teh Isarelnaw hoi Jordan tui a raka awh. ²⁵ Absalom ni Joab e yueng lah Amasa hah ransabawi lah a hruek. Amasa teh Joab e a manu Zeruiah e a nawngaha Nahash canu Abigail ka ipkhai e Ishmael miphun Ithra capa doeh. ²⁶ Isarel miphunnaw hoi Absalom teh Gilead ram dawkh a tungpup awh. ²⁷ Devit teh Mahanaim kho a pha toteh, Ammon ram Rabbah tami Nahash capa Shobi hoi Lodebar, Amiel capa Makhir hoi Rogelim hoi Gilead tami Barzillai tinaw ni, ²⁸ Hote taminaw teh kahrawngum vah a vonhlah awh, a tawntam awh, tui a kahran awh telah ati awh dawkvah, Devit hoi

a taminaw ni canei hanelah catun, barli, pe a phunphun, ²⁹ khoitui, sanutuikamkak, tu, iphah, ailo, kawlung naw hah a sin pouh awh.

18

Absalom duenae

¹ Devit ni ama koe kaawm e naw a touk teh 1000 kaukkung, 100 touh kaukkung kahrawikungnaw a rawi pouh. ² Devit ni tami a patoun teh hu thum touh dawk hu touh Joab ni a uk. Hahoi alouke hu thum touh dawk hu touh hah Joab e nawngaha Zeruijah capa Abisai ni a uk. Kaawm rae hu touh hah Git tami Ittai ni a uk. Siangpahrang ni taminaw koe kai kama roeroe hai nangmouh koe ka cei van han telah ati.

³ Taminaw ni cet hanh. Bangkongtetpawiteh, kaimanaw ka yawng awh nakunghai banglah pouk mahoe. Kaimanaw tangawn kadout awh nakunghai banglah pouk mahoe. Nang nama teh kaimanaw 10, 000 touh hlahk apu na o hnawn. Hatdawkvah, kaimanaw hah khopui thung hoi na kabawm pawiteh hoe kahawi han telah atipouh.

⁴ Siangpahrang ni ahawi na ti awh e patetlah ka sak van han, telah ati. Siangpahrang teh rapan longkha koe a kangdue. Taminaw 100 touh, 1000 touh e ransanaw lahoi a cei awh. ⁵ Siangpahrang ni kaie minhmai na khet awh vaiteh, ka capa Absalom heh paiyai lah tet awh telah Joab, Abisai, Ittai tinaw koe lawk a thui. Hottelah siangpahrang ni Absalom hane lawk a

thui navah, ransa kacuenaw ni lawk a thui e hah a thai awah.

⁶ Taminaw teh Isarelnaw tuk hanelah tarantuknae hmuen a pátam awah. A kátuknae a hmuen teh Ephraim ratu dawk doeh. ⁷ Isarelnaw teh Devit e a sannaw e hmaitung vah a sung awah teh, haw e hnin dawk puenghoi kâtheinae lahoi tami 20, 000 touh a due awah. ⁸ A hmuen tangkuem a kátuk awah teh hat hnin dawk tami ni thei e hlak ratu dawk kadout e hoe a pap awah.

⁹ Devit e a sannaw ni Absalom hah a kâhmo awah. Ahni teh la a dawk tahung lahoi a bu ka rung poung e thingkung rahim a kâen teh a lû teh hote thingkung dawk a mang pouh. Kahlun langboug a kâbang teh la a madueng a yawng. ¹⁰ Kahmawt e tami buet touh ni Joab koevah, kathen dawk Absalom a kâbang e ka hmu telah atipouh.

¹¹ Joab ni na hmu katang e pawiteh bangkongmaw na thei hoeh. Talai vah na bo sak hoeh. Hottelah na sak pawiteh, tangka shekel 10 touh hoi taisawm na poe hane nahoehmaw telah atipouh.

¹² Ahni ni Joab koevah, tangka 1,000 touh ka hmu hane nakunghai siangpahrang e capa dawka kut ka pho mahoeh. Bangkongtetpawiteh, ka hnâthai roeroe vah siangpahrang ni nang hoi Abisai, Ittai koe thoundoun Absalom teh api nang ni hai tek hanh awah telah lawk na thui toe. ¹³ Kai ni ka thet pawiteh, kama ka kâdum e lah ka o teh, ka hringnae a loum hanelah ka o. Siangpahrang ni a panue hoeh e banghai awm

hoeh. Nang hai a hmalah na kangdue van han telah ati.

¹⁴ Joab ni hettelah pawiteh, nang koe kasawlah kaawm thai mahoe, telah ati. Tahroe katham touh ka sin ni teh kathen kung dawk a hring lah ka kâbang e Absalom e a lung dawk pouk a thut pouh. ¹⁵ Joab e senehmaica ka sin e thoundoun 10 touh ni a kalup aw h teh, Absalom teh kadout lah a thei aw h.

¹⁶ Joab ni mongka a ueng teh, Isarelnaw ka pâlei e hah koug a ban aw h. Joab ni abuemlahoi a ngang aw h. ¹⁷ Absalom e ro a la teh, kahrawng e tangkom kadung poung e thung vah, a tâkhawng aw h teh avan vah, talung a pung sin aw h. Isarelnaw teh amamanaw aonae koe lengkaleng a ban aw h.

¹⁸ Absalom ni a hring nah siangpahrang yawn dawkvah lungdon sut la a sak toe. Bangkongtet-pawiteh, ka min a kahma hoeh nahanelah, ka capa hai ka tawn hoeh, telah ati. Hote lungdon hah a min a phu sak aw h teh, atu totouh Absalom pahnim hoeh nahanelah ati aw h.

Absalom a due e Devit ni a panue

¹⁹ Zadok capa Ahimaaz ni BAWIPA ni a taran moi a pathungnae kamthang hah siangpahrang koe ka dei han telah ati. ²⁰ Joab ni sahnin teh kamthang hah deih hanh ei, alouke hnin daw na dei vainei. Siangpahrang e capa a due dawkvah, sahnin teh bang e kamthang hai dei hanh ei, telah atipouh.

²¹ Joab ni Kushi tami koe, cet nateh na hmu e hah dei loe telah atipouh. Kushi tami ni Joab koe

a lûsaling teh kut a man teh a yawng. ²² Zadok capa Ahimaaz ni Joab koevah, bangtelah nakung-hai Kushi tami ka pâlei han telah ati. Joab ni ka capa kamthang kahawicalah kaawm hoeh e hah bangkongmaw yawngkhai han khuet na ngai telah atipouh. ²³ Bangtelah hai ka yawng han telah ati dawkvah, yawng loe atipouh. Hatnavah, Ahimaaz teh kahrawng lam lahoi a yawng teh Kushi tami a yawngtahrei.

²⁴ Devit teh rapan longkha a rahak vah a tahung. Ramveng teh longkha van lah a luen teh a khet navah a madueng ka yawng e tami a hmu. ²⁵ Ramveng ni a hram teh siangpahrang koevah a dei. Siangpahrang ni tami buet touh dueng pawiteh, kamthang dei hane a phu han doeh telah ati. A yawng teh rek a hnai toteh, ²⁶ ramveng ni alouke tami ka yawng e bout a hmu. Ramveng ni tami buet touh a madueng ka yawng e ka hmu telah takhang ka ring e a kaw teh, siangpahrang ni ahni ni hai kamthang a phu dawk doeh atipouh.

²⁷ Ramveng ni ahmaloe e ka yawng e teh Zadok capa Ahimaaz e a yawng e doeh telah ka panue telah ati. Siangpahrang ni ahni teh tamikahawi doeh. Kamthang kahawi a phu dawk han doeh telah ati.

²⁸ Ahimaaz ni a hram teh, siangpahrang koe ahawi doeh, telah ati. Siangpahrang hmalah a minhmai talai dawkkêbet lah a tabut teh, bawipa, ka bawipa, siangpahrang nang koe kut pho hanelah kakâcainaw hah kangangkung BAWIPA Cathut min pholennae awm seh, telah ati.

²⁹ Siangpahrang ni Absalom a hlout maw telah a pacei. Ahimaaz ni siangpahrang e na san Joab ni kaie ka san hah a patoun navah, ruengruengti awh e ka hmu. Hateiteh, kanceng lah ka panuek hoeh telah ati.

³⁰ Siangpahrang ni kaie ka teng kangdout haw atipouh teh, ahni teh a teng vah a kangdue.

³¹ Kushi tami a tho teh, siangpahrang, kamthang ka thokhai, nang na ka taran e naw hah BAWIPA ni ahnimanaw a yonnae patetlah a pathung toe telah atipouh.

³² Siangpahrang ni ka capa Absalom a hlout maw telah a pacei, Kushi tami ni siangpahrang e na tarannaw, nang ka dudam e naw pueng teh hote thoundoun patetlah kounng awm naseh telah ati.

Devit ni Absalom a khui

³³ Siangpahrang teh a lung rei a thai. kho longkha e a lathueng lah a cei teh, a cei laihoi, Oe ka capa Absalom, ka capa, ka capa Absalom nange a yueng lah kai ka due hoeh aw. Oe Absalom, ka capa ka capa telah a khuika.

19

Devit ni Absalom a khui

¹ Siangpahrang teh Absalom hanelah a khui a ka tie Joab koe a dei pouh awh. ² Hot hnin e tânae teh tami pueng hanelah lungmathoe nahanelah doeh ao. Siangpahrang ni a capa pou a khuikakhai tie hah a thai awh. ³ Tarantuknae koehoi ka yawng e naw ni kayanae lahoi khothung duem a kâen awh e patetlah hot hnin navah arulahoï khothung duem a kâen awh.

⁴ Siangpahrang ni a minhmai a ramuk teh, Oe ka capa Absalom, Oe Absalom, ka capa, ka capa telah kacaipounglah a khuika.

⁵ Joab ni siangpahrang koe a cei teh, imthungkhu a kâen, na hringnae na canu na capa a hringnae hoi na yu hoi na yudonaw a hringnae karungngangnaw hah sahnin vah na kaya sak awh toe. ⁶ Nang na kamaithoenaw lung na pataw teh, nang lungpataw naw law teh na maithoe toe. Bangkongtetpawiteh, kacuenaw hoi ransanaw teh nama hanelah bang hoeh lah sahnin na kamnue sak. Absalom hring pawiteh, kaimanaw hah sahnin be kadout awh pawiteh, na lung a hawi han doeh telah sahnin ka hmunaeh lah ao atipouh.

⁷ Thaw nateh alawilah tâcawt nateh, na san-naw hnâroumnae lawk dei pouh leih. Na tâcawt hoehpawiteh, tami buet touh hai atu tangmin nang koe kaawm awh mahoe hoi. Hote hno teh na nawca hoi sahnin totouh nang daw k kaawm e hlak hoe kathout han, telah BAWIPA thoebo laihoi ka dei telah atipouh. ⁸ Siangpahrang teh a thaw teh, rapan longkha koe a tahung. Siangpahrang rapan longkha koe a tahung e taminaw ni a thaï awh toteh, ahni koe a cei awh. Isarelnaw teh amamae rim koelah be a kâran awh.

Jerusalem kho lah Devit a ban

⁹ Isarel miphunnaw daw k buet touh hoi buet touh kâounnae ao. Siangpahrang ni taran kut daw k hoi na rungngang. Filistinnaw e kut daw k thung hoi na rungngang. Atuvah Absalom kecu daw k ram thung hoi a yawng. ¹⁰ Maimouh ni

satui awi awh e Absalom teh tarantuknae koe a due toe. Bangkongmaw siangpahrang bout bankhai awh hane na dei awh hoeh. Bangkong lawkkamuem lah na o awh telah a kâpakung awh. ¹¹ Siangpahrang Dedit ni vaihma Zadok hoi Abiathar koe, Judah kacuenaw koe bangkongmaw siangpahrang hah a im lah ceisak hane, bangkong hnuk na teng awh. Isarelnaw ni a dei awh e lawk patenghai siangpahrang koe a pha teh a thai toe. ¹² Nangmanaw teh ka hmanawngaha ka hru, ka tak doeh. Siangpahrang koe bout thaisak hane hah bangkong hnuk na teng awh.

¹³ Amasa koevah, nang hah kaie ka hru, ka tak lah na awm hoeh maw. Joab yueng lah ka hmaitung ransabawi lah na awm sak hoehpawiteh, Cathut ni ahawi ati e patetlah kai dawak sak naseh, telah dei pouh awh, telah tami a patoun.

¹⁴ Hottelah Judah miphunnaw hah lungthin buet touh e patetlah ao sak. Siangpahrang koevah, a taminaw hoi ban awh telah dei pouh hanelah taminaw hah a patoun.

¹⁵ Siangpahrang teh a ban teh, Jordan tui koe a pha. Judahnaw ni siangpahrang a dawn awh teh, Jordan tui namran lah thak hanelah Gilgal kho koelah a cei awh. ¹⁶ Benjamin miphun Bahurim kho e tami Gera capa Shimei teh karanglah siangpahrang dawn hanelah Judahnaw koe a cei van. ¹⁷ Benjamin miphun 1, 000, Sawl imthung e a san Ziba hoi a capa 15 touh hoi a san 20 touh a tho awh teh, siangpahrang e a hmaitung vah Jordan tui a raka awh. ¹⁸ Siangpahrang imthungnaw a thak sak nahanelah, a panki e

sak nahanelah, a ceikhai awah. Jordan tui a raka awah navah, Gera capa Shimei teh siangpahrang hmalah a tabo.

¹⁹ Ka bawipa ni payonnae ka tawn e lah na pouk hanh naseh. Siangpahrang ka bawipa ni Jerusalem a tâcotakhai hnin vah, na san ni kalan hoeh e lah sak e hah, na pâkuem pouh hanh. Siangpahrang ni a lung dawk pâkuem hanh naseh. ²⁰ Na san ni yonnae ka sak e hah na san kai ni ka panue. Hateiteh, Joseph imthungnaw daw, ka bawipa dawn hanelah ahmaloe ka tho e doeh telah ati.

²¹ Zeruah capa Abisai ni BAWIPA ni satui a awi e thoe a bo dawkvah, Shimei hah dei hane nahoehmaw telah ati.

²² Devit ni nangmanaw Zeruah capanaw sahnin kai na taran hane, kai hoi bangmaw na kâseng awah. Sahnin Isarel ka kâtet pueng thei hanelah maw kai teh sahnin Isarel siangpahrang lah ka o tie ka panuek hoeh na maw telah ati.

²³ Siangpahrang ni Shimei koevah, na dout mahoeh telah lawk a kam.

Devit hoi Mephibosheth kâhmonae

²⁴ Sawl capa Mephibosheth teh siangpahrang dawn hanelah a tho. Siangpahrang a cei hnin hoiyah karoumcalah bout a tho hoehnahlan totouh, a khok pâsu hoeh, a pâkhamuen ngaw hoeh, a hni hai pâsu hoeh. ²⁵ Siangpahrang dawn hanelah Jerusalem kho koe a pha navah, siangpahrang ni Mephibosheth, bangkong kai koe na cei van hoeh telah ati.

²⁶ Oe siangpahrang ka bawipa, ka san ni na dum. Bangkongtetpawiteh, na san ni siangpahrang koe cei hanelah la kâcui thai nahanlah kârasoup han ka ti ei, na san teh ka khokkhem.

²⁷ Siangpahrang ka bawipa nang koevah, na san heh na pathoe. Hateiteh, siangpahrang ka bawipa teh, Cathut kalvantami patetlah ao. Ahawi na tie patetlah sak lawih. ²⁸ Bangkongtetpawiteh, imthungnaw heh siangpahrang hmaitung be thei hanelah a kamcu. Hatei, na san teh caboi dawkravca ka ven e lah na o sak. Hatdawkvah, siangpahrang koevah kai ni hno alouke ka hei ngam hane bangmaw kaawm telah atipouh.

²⁹ Siangpahrang ni nange kong bangmaw dei hanelah kaawm. Nang hoi Ziba ni lawhmuen na kârei roi han telah kai ni ka dei toe tayaw telah ati.

³⁰ Mephibosheth ni siangpahrang koevah, siangpahrang teh ama im vah karoumcalah a pha dawkvah, ama ni abuemplahoi lat lawi naseh telah atipouh.

Devit ni Barzillai a pahren

³¹ Gilead tami Barzillai hah Rogelim kho lahoi a tho teh, siangpahrang teh Jordan tui rakakhai hanelah ahni koe a cei van. ³² Barzillai teh a kum 80 touh a pha toe. A matawng toe. Mahanaim vah siangpahrang ao nah thung teh canei hane kawi ouk a poe. Bangkongtetpawiteh, ahni teh ka tawnta poung e lah ao.

³³ Siangpahrang ni Barzillai koevah, kai koe tho van nateh, Jerusalem kho kai koe awm nateh, na kawkravca han telah atipouh.

³⁴ Barzillai ni siangpahrang koevah, nâsittouh maw ka hring rah vaiteh, Jerusalem siangpahrang koe ka cei van han vaiyoe. ³⁵ Sahnin kai teh kum 80 touh ka pha toe. A thoe hoi hawi kapek thai hoeh toe. Kai ni ka canei e a tui hoi tui hoeh e hai ka panue yaw tOUNG. Tongpa napui naw e la sak pawlawk hai ka thai hoeh toe. Na san kai ni siangpahrang ka bawipa hanelah, hmuenri lah khuet ka o han vaw. ³⁶ Na san ni siangpahrang koe, Jordan tui na raka totouh dueng doeh ka tho thai ti. Bangkong nama siangpahrang ni het patetlae tawkpheu khuet na poe han vaw. ³⁷ Na san kai teh ka onae kho dawK, apa e tangkom koe ka due hanelah na ban sak leih. Na san Khimham ao doeh. Siangpahrang hoi rei cet sak. Ahawi na tie patetlah na sak han telah atipouh.

³⁸ Siangpahrang ni Khimham teh kai hoi rei ka cei roi han. Ahawi na tie patetlah ahni dawK ka sak han. Na hei e pueng hai na sak pouh han telah atipouh.

³⁹ Tami pueng hai Jordan tui namran lah a raka awH. Siangpahrang ama dueng a raka hnukkhu, Barzillai hah a tapam a paco teh yawhawi a poe teh aonae koe lah a ban.

Siangpahrang kong dawK kâounnae

⁴⁰ Siangpahrang teh Gilgal kho a cei. Khimham hai ahni koe a cei van. Judahnaw ni siangpahrang teh a thak awH. Isarel taminaw ni hai a thak awH van. ⁴¹ Isarelnaw pueng siangpahrang koe a tho awH teh, bangkongmaw hmaunawngHa Judahnaw ni hoe a hnai awH teh, siangpahrang

hoi a imthungnaw hoi Jordan tui namran lah koug a ceikhai awh telah ati awh.

⁴² Judahnaw ni siangpahrang teh kaimouh hoi kâhnai e lah ao dawkvah, bangkongmaw hete kong dawk na lungkhuek. Siangpahrang e rawcanaw kaimouh ni ka ca ka nei awh maw. Kaimouh koe na poe awh e hno ao maw telah Isarelnaw hanelah atipouh.

⁴³ Isarelnaw ni Judahnaw koe kaimouh ni siangpahrang dawk hra touh coe hane ka tawn awh. Devit dawkvah nangmanaw hlak pang hane hoe ka tawn awh. Siangpahrang ban sak hane kong dawk kaimouh hoi apuengcue kâpannae awm laipalah, bangkong kaimanaw na dudam awh telah Judahnaw koe bout a dei pouh awh. Judahnaw e lawk hah Isarelnaw e lawk hlak hoe a hram.

20

Sheba taranthawnae

¹ Benjamin miphun Bikhri capa a min teh Sheba tie taran ka thaw e buet touh ao. Ahni ni mongka a ueng teh Oe Isarel miphun maimouh teh Devit koevah, buet touh hai coe hane tawn awh hoeh. Jesi capa koevah râw coe hane kamcu awh hoeh. Isarelnaw namamae rim koe lengkaleng cet awh telah atipouh.

² Isarelnaw ni Devit hnukkâbang awh hoeh toe. Bikhri capa Sheba hnuk a kâbang awh. Judahnaw ni Jordan hoi Jerusalem kho totouh siangpahrang koe a kâhnai awh.

³ Devit ni Jerusalem ama im a pha toteh, siangpahrang ni a yudo 10 touh im ka ring

hanelah a hruék e hah a ceikhai téh, a paung. A canei kapoenaw ni canei kawí a poe awh éi téh, amamouh koe kâén awh hoéh. A due hnín totouh a paung awh téh lahmáinaw patétlah ao awh.

⁴ Siangpahrang ni Amasa koevah, hnín thum touh thung Judahnaw hah kamkhueng sak nateh, ahnimouh hoi rei na tho han telah atipouh.

⁵ Judahnaw kamkhueng sak hanelah Amasa téh a cei. Hatei, Devít téh a hnín a khoe e hlak hnuk a teng.

⁶ Devít ni Abishai koevah Bikhri capa Sheba ni Absalom hlak hai runae na poe han, na bawipa e sannaw kaw nateh ahnimanaw pâlei awh telah hoéhpawítéh, ahni téh kacakpoungé kho buétbuet touh kâén vaítéh, maimae kut dawkhói a hlout han doéh telah Abishai koe a dei pouh.

⁷ Joab e taminaw Keréth tami, Phelet taminaw hói tami a thakasainaw ni a hnukkâbang awh. Jerusalem hói Bikhri capa Sheba pâlei hanelah a kamthaw awh. ⁸ Gideon kho dawkhói e lungsong onae koe a pha awh toteh, Amasa ni ahnimanaw a dawn. Joab ni puengcang a kâmahrawk téh a keng dawkhói taisawm hói tahloi a neng. A cei nalaihói tahloi a yut téh a bo.

⁹ Joab ni Amasa koevah, ka nawnggha na dam ou telah ati. Joab ni a kâsak téh a paco han a dei téh a pâkhamuen a rang lae kut hói a kuet.

¹⁰ Joab ni avoilae kut dawkhói sarai a sin e hah Amasa ni a pouk hoéh dawkhói, a von dawkhói a thut pouh téh a ruen hah talai dawkhói a bo. Bout thun hoéh toe. Amasa téh a due. Joab hói

a nawnggha Abishai ni Bikhri capa Sheba hah a pâlei roi.

¹¹ Ahni e a teng Joab e tami buet touh a kangdue teh, Joab hoi Devit koelah ka kampang e pueng ni Joab heh pou ring naseh telah a ti. ¹² Amasa teh lam dawkvah a thi hoi pukkâkaawk. Ka tho pueng ni a hmu awh teh a kangdue awh. Joab e tami ni taminaw a kangdue e a hmu awh toteh, Amasa e a ro hah lam dawkh oi a la awh teh, kahrawng vah a puen awh teh hni hoi a ramuk awh. ¹³ Haw e lam dawkh oi a puen awh hnukkhu, Bikhri capa Sheba pâlei hanelah taminaw ni, Joab e hnuk a kâbang awh.

¹⁴ Joab ni Bethmaakha ram Abel kho totouh Isarel ram pueng koe a cei. Bere taminaw koehai a cei teh taminaw a pâkhueng teh, Sheba hnuk a kâbang awh.

¹⁵ Sheba a luennae Bethmaakha ram Abel kho hah a kalup awh. A kho teng vah talai avoivang lah a paten awh. Rapan raphoe hanelah thouk a phom awh. ¹⁶ Hatnavah, a lungkaang e napui buet touh ni khothung hoi a hram teh a dei e teh, thai awh haw, thai awh. Kai ni Joab hoi lawk ka dei thai nahanelah tho loe telah Joab koe dei pouh awh telah a ti.

¹⁷ Joab rek a hnai teh napui ni nang hah Joab vai khe, telah a pacei. Oe kai doeh atipouh. Napui ni kaie lawk thai haw atipouh navah, Joab ni ka thai doeh telah atipouh.

¹⁸ Ayan teh Abel kho vah kho a khang awh han rah, ouk ati awh. Hottelah laidei pou a tâtueng awh. ¹⁹ Kai teh Isarelnaw dawkh roumnae ka ngai e hoi yuemkamcu e lah ka o. Nang teh Isarel kho

koung raphoe hanelah na kâcai. Bangkongmaw BAWIPA e râw hah he pahma hanelah na kâcai telah a dei.

²⁰ Joab ni he pâhma hane, raphoe hane kâcainae awm hoeh bo. ²¹ Hottelah nahoe bo, Ephraim mon daw k e Bikhri capa a min teh Sheba ni amae siangpahrang hah a taran toe. Ahni hah na poe awh haw. Na poe awh pawiteh kho daw k hoi ka tâco han telah ati. Napui ni Joab koevah, kenhaw! a lû teh rapan hloilah ka tâkhawng han telah a ti.

²² Hote napui teh a lungang e patetlah taminaw koe a cei hnukkhu, Bikhri capa Sheba lû a tâtueng awh teh Joab koelah alawilah a tâkhawng pouh awh. Joab ni mongka a ueng teh taminaw teh hote kho daw k hoi amamouh onae koe bout a ban awh. Hahoi, Joab teh Jerusalem siangpahrang koe a ban.

Devit kut rahim e kacuenaw

²³ Joab teh Isarel ransanaw e ransabawi lah ao. Jehoiada capa Benaiah teh Kereth tami hoi Pelet taminaw kaukung lah ao. ²⁴ Adoram teh tamuk thaw ka kuen e lah ao. Ahilud capa Jehoshaphat teh kamthang kathutkung lah ao. ²⁵ Sheva teh ca kathunkung lah ao. Zadok hoi Abiathar teh vaihma lah ao. ²⁶ Jair tami teh Devit e ram kaukung bawi lah ao.

21

¹ Devit e tueng daw k kum thum touh rawca takang a tho teh, Devit ni BAWIPA koe lawk a pacei, BAWIPA ni Sawl hoi a imthung,

thipalawngnae kecu dawk doeh, Gibeon taminaw a thei awh telah ati.

² Siangpahrang ni Gibeon taminaw a kaw. Gibeon taminaw heh Isarel miphun e a canaw nahoe. Amor tami daw k e ka cawi e doeh. Isarelnaw ni ahnimouh koe lawk a kam awh toe. Sawl ni Isarel miphunnaw hoi Judahnaw hanelah a panki pouh e kecu daw k thei hane ouk a kâcai awh.

³ Dedit ni Gibeonnaw koe bangmaw na sak pouh awh han. BAWIPA e râw hah yawhawi na poe awh thai nahan, bangpatet lae yonthanae maw ka sak han telah atipouh.

⁴ Gibeonnaw ni ahnimanaw koe, Sawl hoi a imthungnaw daw k tangka hoi sui ka het awh hoe. Isarelnaw buet touh hai thei thainae ka tawn awh hoe telah ati. Ahni ni na dei e pueng kai ni na sak pouh han telah atipouh.

⁵ Ahnimouh ni siangpahrang thei hane ka kâcai e hoi Isarel ram roeroe daw k ao hoe nahanelah, na kayouknaw, ⁶ a capa sari touh na poe awh haw. BAWIPA ni a rawi e Sawl onae Gibeah vah BAWIPA hmaitung kâbang awh han telah ati. Siangpahrang ni na poe awh han telah atipouh.

⁷ Hateiteh, siangpahrang ni BAWIPA koevah, Dedit hoi Sawl e capa Jonathan rahak, ahnimouh roi a rahak e lawk a kam e kecu daw k Sawl e capa Jonathan e capa Mephibosheth hah a hlout sak. ⁸ Siangpahrang ni Aiah canu Rizpah ni Sawl hanelah ca tongpa kahni touh, Armoni hoi Mephibosheth, Sawl canu Mikhal ni Meholath tami Barzillai capa Adriel hanlah a sak pouh e ca tongpa panga touh a la teh, ⁹ Gibeonnaw e

kut dawk a poe. Ahnimanaw ni BAWIPA hmalah mon dawkvah a bang awah. Hottelahoï sari touh e naw teh a due awah. Canga tue nah hnin touh dawk a thei awah teh, a due awah.

¹⁰ Aiah canu Rizpah ni burihni a la teh, canga a kamtawng koehoi kho a rak hoehnahlan totouh, napon hah a la teh, talung van dawk a i nahan a phai. Kanîthun vah ro e a van vah tava a cu hane hoi tangmin vah sarang ni ca hane a pasoung hoeh teh a ring.

¹¹ Aiah canu Sawl e a yudo Rizpah hno a sak e Devit koe a dei pouh awah. ¹² Filistinnaw ni Gilboa mon dawk Sawl a thei awah teh, a ro hah a bangnae, Bethshan lam hoi kaparawtnaw Jabesh hoi Gilead ram e khocanaw aona koe siangpahrang ni a cei teh, Sawl e a hru hoi a capa Jonathan e a hru hah a la awah. ¹³ Hote hmuen koehoi Sawl hoi Jonathan e a hru a ceikhai awah teh, a bang awah e hru hai a la awah. ¹⁴ Sawl hoi a capa Jonathan e a hru hah Benjamin ram e Zelah kho e a na pa Kish e tangkom dawk a pakawp awah teh, siangpahrang ni kê a poe e patetlah a sak. Hathnukkhu a ram hane ratoumnae lawk hah Cathut ni a thai.

Filistin tami kalen theinae

¹⁵ Filistinnaw ni Isarel hah bout a tuk awah. Devit teh a taminaw hoi a cathuk awah teh, Filistinnaw hah a tuk awah nah, Devit teh hroung a tawn. ¹⁶ Ephraim miphun Ishbibenob tami Rapha catoun Ishbibenob, a tahroe a ri e rahum shekel 300, tahloi a katha e hoi Devit thei hanelah a kêcai. ¹⁷ Zeruah capa Abishai ni a kabawp teh, Filistin tami hai a thei. Hatnavah, Devit e a

taminaw ni, Isarel angnae roum langvaih tie hah a ngaihri awh dawkvah, nang teh kaimanaw hoi na cet mahoech telah lawk a kam awh.

¹⁸ Goba kho vah, Filistinnaw a tuk awh navah, Hushath tami Sibbekhai ni Ephraim miphun Saph hah a thei.

¹⁹ Filistinnaw hoi Goba khovah, bout a kâtuk awh. Bethlehem kho e Joaareoregim capa Elhanan ni Git tami Goliath hah a thei. A tahroecung teh hni kawng kalawng e patetlah ao.

²⁰ Gath khovah kâtuknae bout ao teh, hawvah, ka rasang poun e aranglae kut roi daw kcutcarei taruk touh, avanglae a khok roi daw k a khokcarei taruk, asumkum 24 touh ka tawn e ao. Filistin miphun tamikalennaw doeh.

²¹ Isarelnaw a tuk navah, Devit e a hmau Shimei capa Jonathan ni ahni hah a thei.

²² Ahnimanaw pali touh e naw teh, Gath kho daw kkaawm e Rapha tami kalenpoung e capa lah ao teh, Devit hoi a sannaw e kut daw k hoi a due awh.

22

Devit e lunghawi la

¹ Devit ni, Sawl hoi a taran pueng e kut thung hoi BAWIPA ni a rungngang nah hnin vah, BAWIPA e hmaitung a sak e lanaw teh:

² BAWIPA teh kaie lungsong, kaie rapan, kai na kahloutsakkung bawi.

³ Ka thaonae kaie Cathut, kai ni ka kâuep e, ka bahling hoi kai rungngangnae ki, ka rapanim kânguenae lah ao. Kaie rapan lah na o. Rektapnae thung hoi na rungngang haw.

4 Pholen han kamcu e BAWIPA teh ka kaw vaiteh, taran kut dawk hoi na rungnang han.

5 Duenae tuicapa ni na kalup teh Cathut banglah noutnaehnae tuicapa ni na taki sak.

6 Sheol lungmathoenae ni na kalup aw h teh, duenae karapnaw ni sut na pawp.

7 Ka lungreithai navah, BAWIPA ka kaw teh, ka Cathut koevah ka hram. Bawkim dawk hoi ka lawk a thai teh, ka hramnae lawk hah a hnâ thung a kâen.

8 Hatnavah, a lungkhueknae lahoi talai a kâhuetsak, kalvan du ditouh lengleng a kâhuet.

9 A hnawng dawk hoi hmaikhu a tâco teh, a pahni dawk hoi hmaikaknae lahoi, hmaisaaan kaman sak.

10 Ama ni kalvan hai a pakui teh, a khoktabei rahim kho lah a hmo.

11 Cherubim a kâcui teh a kamleng. Bokheiyah, kahlînaw e rathei van a hmu aw h.

12 A hmonae hah ama kalupkung lah a sak teh, tui hoi katha poung e tâmainaw a pâkhueng teh,

13 a hma lae angnae lahoi hmaisaaan a kaman sak.

14 BAWIPA teh kalvan vah a cairing teh, ka lentoe poung e Cathut ni lawk a dei.

15 Licung samtang a pathui teh, ahnimanaw a kâkayei sak. Sumpapalik sak teh ahnimanaw hah a rawk sak.

16 BAWIPA ni yuenae hoi a hnawng dawk hoi kahlî a tâco sak e lahoi, tuipui a dengnae koehoi talaivan adu ungnae hah koung a kamnue sak.

17 A rasangnae hmuen koehoi a kut a kâyap teh, tui moikapap thung hoi na rasa.

18 A thakasaipoung e taran kut thung hoi na rungngang. Ahnimouh ni kai na hmuhma aw h teh, kai hlak a thasai aw h.

19 A rucatnae koe ka phanae tueng daw k, na ngang aw h nakunghai, BAWIPA teh kaie kânguenae lah ao.

20 Kai hah kalenpoung e hmuen koe na ceikhai aw h teh, kai daw k a lunghawi daw kvah, na hlout sak.

21 BAWIPA ni ka lanna e patetlah na taw kphu na poe teh, ka kut a thoung e patetlah na patho.

22 Bangkongtetpaw iteh, BAWIPA e a lamthung hah pou ka dawn teh, kaie Cathut koehoi yon hoi kahmat boihoeh.

23 A lawkcengnae pueng hah ka hmaitung vah ao. A phunglam ka cettakhai boihoeh.

24 A hmaitung hai toun hane kawi lah kaawm hoeh. Ka payonpakainae daw k hoi na hlout sak.

25 Hatdaw kvah, ka lanna e patetlah na pathung. A mithmu vah kathoung e patetlah na patho.

26 Pahrennae ka tawn e koe pahrennae ka tawn e patetlah na kamnue teh, tamikalan koe tamikalan lah na kamnue van han.

27 Tamikathoung koe, kathoung e lah na kamnue vaiteh, tami lungkapatakna w koe a lungpatanae lahoi na kamnue van han.

28 Kârahnoum e tami hah na rungngang teh, kâoupnaw na pabo hanelah pou na khet.

29 Oe BAWIPA, nang teh kaie hmaim lah na o. BAWIPA ni kaie hmonae a ang sak han.

30 Kai ni nang na kângue e lahoi ransahu ka tâ teh, rapan hai ka yawngtapue thai.

³¹ Cathut e a lamthung teh a kuep. Yuemkamcu lawk teh tanouk lah ao. Kâuepnaw pueng hanelah bahling lah ao.

³² BAWIPA hoeh e laipalah Cathut alouke ao maw. Cathut laipalah, lungsong alouke ao maw.

³³ Cathut teh ka thaonae hoi ka kângue e lah ao, ka lamthung a hmacawn sak.

³⁴ Ka khok heh sayuk e a khok patetlah a hue a rang sak teh, a hmuen karasang e koe na o sak.

³⁵ Ka kut teh tarantuk nahan a cangkhai. Hottelah rahum licung hai ka sawn thai.

³⁶ Nama ni rungngangnae saiphei hah na poe teh, a lungsawnae lahoi kai teh na tawm rasang e lah ka o.

³⁷ Kai ni ka cei nahane lamthung na pacei teh, ka khoknaw hai thawn hoeh.

³⁸ Ka tarannaw ka pha teh ka thei, koug ka thei hoehroukrak kai ni ka ban hoeh.

³⁹ Kaie ka khok rahim a rawp awh teh, a thaw thai awh hoeh nahanelah, katinkaawi teh ka thei.

⁴⁰ Bangkongtetpawiteh, tarantuk sak hanelah, nang ni thaonae hoi na pathoup teh, kai na katuknaw hah kaie rahim na sung sak.

⁴¹ Kai na ka hmuhma e a lahuennaw hah kai koe na poe teh, nama ni kai na katuknaw hah hnuklah na kamlang sak.

⁴² A hram awh ei, ka rungngang hane tami awmhoeh. BAWIPA teh a khet awh ei, pato awh hoeh.

⁴³ Hatnavah, kai ni ahnimanaw hah vaiphu patetlah reppasei lah ka phawm teh, lam dawk songnawng patetlah ka coungroe awh teh, ka-heikalai awh.

⁴⁴ Nang ni ka taminaw hoi hawihoe hnae dawk hoi na rungngang teh, Jentelnaw e kaukkung lah na o sak nahanelah, na ring e ka panuek boihoe e naw ni, kaimae thaw a tawk aw h han.

⁴⁵ Jentelnaw hah kai koe a kâpoe aw h vaiteh, a thai aw h tahma ka lawk a ngai aw h han.

⁴⁶ Jentelnaw a tâco aw h han.

⁴⁷ BAWIPA teh yungyoe a hring. Kaie lungsong, pholennae lah aw m seh. Kaie rungngangnae lungsong Cathut teh, tawmrasang e lah aw m naseh.

⁴⁸ Kai koe lah moi ka pathung pouh e hoi miphun pueng kaie rahim ka pabawt e teh katâkung Cathut doeh.

⁴⁹ Tarannaw e kut dawk hoi, na hlout sak. Kai na ka taran naw e a lathueng vah, na tawm teh, ka mathoutmakainaw e kut dawk hoi na hlout sak.

⁵⁰ Hatdawkvah, Oe BAWIPA, kai teh Jentelnaw koevah, lunghawinae lawk ka dei vaiteh, na min pholennae la ka sak han.

⁵¹ Cathut teh a siangpahrang hanelah, rungngangnae imrasang lah ao teh, satui a awi e Devit hoi a canaw koe lathueng vah yungyoe hoi yungyoe totouh, pahren lungmanae a kamnue sak.

23

A hnukteng Devit e lawk

¹ Hetnaw teh a hnukteng Devit ni lawk a dei e naw doeh. Jesi capa Devit a rasangnae koe tawmrasang e lah ao teh, Jakop Cathut ni satui a awi e, Isarel hanelah la kahawi ka

phuengkung ni hettelah a dei. ² BAWIPA e Muitha ni kai hno lahoi a dei. A lawk teh ka lai dawk ao. ³ Isarel Cathut Isarel lungsong ni, kai koevah a dei. Taminaw kaukkung teh, a lan roeroe vaiteh, Cathut taki nalaihoi a uk han. ⁴ Khopâui hoeh, kanî ka tâcawt e amom e angnae patetlah thoseh, khorak hnukkhu, kanî a tâco teh talai dawk hoi phokahring ka cawn e patetlah thoseh ao han. ⁵ Ka imthung teh Cathut hoeh laipalah nakunghai, a yungyoe lawkkamnae kai hoi ka sak roi toe. Hote lawkkam teh tangka kuep hoeh nakunghai, kaie rungngangnae hoi kai ni ka ngainae lah ao. ⁶ Kai cungkeihoehe taminaw teh, tâkhawng e pâkhig patetlah ao. Bangkongtetpawiteh kut hoi la thai lah awm hoeh. ⁷ Ka tek e tami ni sum hoi tahroe hah hno han a ngai. Hahoi teh, amamae hmuen dawk hmai hoi koug sawi lah ao han telah na pato a ti.

Devit e tami a thakasainaw

⁸ Hetnaw heh Devit e athakaawme taminaw doeh. Takhemon tami Joshebbashebeth teh ransa kacuenaw thung dawk kacuepoung e lah ao. Ahni teh tahroe hah a sin teh, tami 800 touh vaitalahoi a thei.

⁹ Ahni hnuk vah, Aho capa Dodo, Dodo capa Eleazar doeh. Ahni teh taran ka tuk hanelah kamkhueng e Filistinnaw hoi a kâtâ awl lahun hah, Isarelnaw koug a yawng navah, Devit koe e athakaawme taminaw kathum touh thung dawk e buet touh lah ao.

¹⁰ Ahni teh a thaw teh, Filistinnaw koe a kut a pho teh a kut nget a tawn totouh Filistinnaw hah a bouk. Hot hnin vah BAWIPA ni lentoenae lahoi

a tâ pouh. Ahnimanaw teh tarannaw e hnopai hah a la hanelah doeh a ban aw h toe.

¹¹ Ahni hnuk vah, Hararite tami Agee capa Shammah doeh. Baphoungkung a thanae hmuen koe Filistinnaw a kamkhueng aw h teh, taminaw ni Filistinnaw a yawng takhai aw h. ¹² Ahni teh hote hmuen koe a kangdue teh a ring. Filistin tami hah a thei teh, BAWIPA ni kalenpounge tânae a poe.

¹³ Ransa tarankahawi e thung daw k 30 touh a cathuk aw h teh, canganæ tueng daw k, Devit aonæ koe Adullam talungkhu daw k a cei aw h teh, Filistin ransanaw teh Rephaim yaw n daw k a tungpup aw h. ¹⁴ Hatnae tueng navah, Devit teh rapan daw k ao teh, Filistinnaw teh Bethlehem kho vah ao aw h. ¹⁵ Devit ni dik a doun nalaihoi Bethlehem e tuikhu tui rapan teng e hah nei hane na kapoekung aw m haw pawiteh aw telah a ti. ¹⁶ Athakaawme taminaw kathum touh ni Filistin ransahu pat a raka teh rapan teng e Bethlehem kho e tuikhu tui hah a do aw h. Devit koe a ceikhai aw h teh, ahni ni net ngai hoeh. BAWIPA e hmaitung vah a rabaw k. ¹⁷ Oe BAWIPA hete tui heh kai ni ka net mahoe h. Due hane hai taket laipalah kacetnaw e thi phu hah ka nei han namaw, telah ati. Net laipalah ao. Athakaawme taminaw kathum touh e ni a sak aw h e doeh.

¹⁸ Zeruah capa Joab e a hmaunawng ha Ab-shai teh kathum touh thung daw k kacuepoung lah ao. A tahroe hoi tami 300 touh a thei daw kvah, kathum touh thung daw k minhawinae a hmu. ¹⁹ Kathum touh thung daw kvah, oup hane nahoe hmaw. Hatdaw kvah, kacue e lah ao.

Hateiteh, a hmaloe e tarankahawi e ransanaw phat hoeh.

²⁰ Kebzeel tami tarankahawi capa Jehoiada capa Binaiah ni thaonae hno moikapap a sak. Moab tami a min kamthang sendek patet e tami kahni touh a thei. Kasik thapa dawk hai alouk lae lungngoum thung kaawm e sendek hah a thei. ²¹ Tami kalenpounge Izip tami hah a thei. Izip tami ni tahroe a sin eiteh, Benaiah ni sonron dueng hah a sin teh, a cei. Izip tami e a kut dawk e tahroe a lawp teh hot e tahroe hoi ama hah a thei. ²² Jehoiada capa Benaiah niteh, hot patet lae hno hah a sak dawkvah, athakaawme taminaw kathum touh thung dawk minhawinae a hmu. ²³ Tami 30 touh hlak bari hane kawi lah ao. Hateiteh, ahmaloe e kathum touh phat hoeh. Devit ni ama karingkungnaw e kacue lah a hruek.

²⁴ Joab e nawngaha Ashahel teh, tami 30 touh thung dawk buet touh lah ao. Bethlehem kho e Dodo capa Elhanan, ²⁵ Harod tami Shammah, Harod tami Elika, ²⁶ Palti tami Helez hoi Tekoa tami Ikkesh capa Ira, ²⁷ Anathoth tami Abiezer hoi Khushathi tami Mebunnai, ²⁸ Aho tami Zalmon hoi Netophah tami Maharai, ²⁹ Netophah tami Baanah capa Heleb, Benjamin casaknaw Gibeah tami Ribai capa Ittai, ³⁰ Pirathon capa Benaiah, Gaash yawn dawk e Hiddai, ³¹ Arbath tami Abialbon hoi Barhum tami Azmaveth, ³² Shaalbon tami Eliahba hoi Jashen casaknaw thung dawk e Jonathan, ³³ Hararite tami Shammah, Hararite tami Sharar capa Ahiam, ³⁴ Maakath casak Ahasbai capa Eliphelet, Giloh

tami Ahithophel capa Eliam, ³⁵ Karmel tami Hezro hoi Arab tami Paarai, ³⁶ Zobah tami Nathan capa Igal, Gad tami Bani, ³⁷ Ammon tami Zelek, Zeruah capa Joab e senehmaica kaphawtkung Beeroth tami Naharai, ³⁸ Ithrite tami Ira hoi Ithrite tami Gareb, ³⁹ Hit tami Uriah, abuemlahoi 37 touh a pha awh.

24

Devit ni Judah hoi Isarelnaw a touk

¹ BAWIPA teh Isarelnaw koe a lungkhuek teh, Isarelnaw hoi Judahnaw hah touk haw, telah Devit hroecoe sak hanelah a lungthin a tacuek.

² Siangpahrang ni ama koe kaawm e rans-abawi Joab koe Isarel miphun pueng Dan kho hoi Beersheba kho totouh cet aw h nateh, tami nâyittouh maw tie ka panue thai nahan touk aw haw atipouh.

³ Joab ni siangpahrang koevah, BAWIPA na Cathut ni taminaw moikapap lah bout a pung sak teh, a let 100 touh haiyah na hmu hanelah siangpahrang ka bawipa ni, bangkongmaw hot hah panue han na ngai telah atipouh.

⁴ Hateiteh siangpahrang e lawk ni Joab hoi a ransanaw hah a tâ dawkvah, Joab hoi ransa kacuenaw ni taminaw touk hanelah ahni koehoi a tâco aw h.

⁵ Jordan tui a raka aw h teh, Gad yawn lungui kaawm e Jazer koelae Aroer kho a roe aw h. ⁶ Gilead ram hoi Tahtimhodshi ram vah a pha aw h. Danjaan ram hoi Sidon tengpam ram totouh a kalup aw h. ⁷ Taire rapanim koe a pha aw h teh, Hiv khonaw, Kanaan taminaw e

khopuinaw koe a pha awh. Judah ram akalah thoseh, Beersheba totouh thoseh thouk a cei awh.

⁸ Ram tangkuem be a katin awh teh, thapa yung tako touh hoi a hnin 20 touh a kuep hnukkhu, Jerusalem kho dawk a pha awh. ⁹ Joab ni milu cayin hah siangpahrang koe a poe. Isarel dawk tahloi ka sin ni teh tarankahawi e tami 800, 000 Judahnaw dawk 500, 000 touh a pha awh.

¹⁰ Tami be a touk hnukkhu, Devit ni amahoima yon a kâpen. Devit ni BAWIPA koevah, ka sak e hno dawk puenghoi ka payon toe. Oe BAWIPA na san kaie yon na takhoe pouh haw. Pathu laihoi doeh hno ka sak toe telah a ti.

Devit tounnae

¹¹ Devit teh amom a thaw navah, BAWIPA e lawk hah Devit e profet Gad koe a pha. ¹² Cet nateh, Devit koe hettelah dei pouh. Hno kathum touh nang koe na patue. Nang dawk kai ni ka sak hane buetbuet touh na rawi han, telah a dei e lawk hah patuen dei pouh haw telah atipouh.

¹³ Gad teh Devit koe a cei teh, Na ram daw kum thum touh thung takang ka tho sak maw na ngai, Nahoeh pawiteh, thapa yung thum touh tarannaw ni na pâlei maw na ngai, Nahoeh pawiteh, hnin thum touh thung Lacik ka phasak maw na ngai. Na kapatoukung koe bangtelamaw ka dei pouh han, kâpouk nateh, dei haw telah atipouh.

¹⁴ Devit ni Gad koevah, kângailah a ru toe. BAWIPA e kut daw k bawt naseh. Bangkongtet-pawiteh, a lungmanae teh a len. Tami e a kut

dawk teh na phat sak hanh telah Gad koe a dei pouh.

¹⁵ BAWIPA ni Isarelnaw koe amom hoi atueng a khoe e totouh, patawnae a pha sak. Dan kho hoi Beersheba kho totouh tami 70, 000 touh a due aw. ¹⁶ Kalvan tami ni Jerusalem kho hah ka raphoe han telah, a kut a dâw navah, BAWIPA ni haw e runae dawk hoi a kamlang teh, tami ka raphoe e kalvantami koevah, a khout toe na kut dâw hanh lawi telah atipouh. Hatnavah BAWIPA e kalvantami teh, Jebusit tami Araunah e cangkatinnae teng vah ao.

¹⁷ Taminaw kathetkung kalvan tami hah Devit ni a hmu navah, kai ka payon toe, hnokahawi hoeh e ka sak toe. Hatei teh hete tunaw ni bangmaw a sak aw, na kut teh kai hoi apa imthung dawk phat naseh telah BAWIPA koe a ti.

¹⁸ Hote hnin dawk Gad ni Devit koe a tho teh, cet haw. Jebusit tami Araunah e cangkatinnae teng vah BAWIPA hanelah thuengnae khoungroe na sak han telah atipouh.

¹⁹ BAWIPA ni a dei e patetlah Devit ni a cei. ²⁰ Hottelah siangpahrang teh a taminaw hoi a tho e hah Araunah ni a khet teh a hmu navah, alawilah a tâco teh, siangpahrang e a hmalah a tabo.

²¹ Kaie bawipa siangpahrang teh a san koe bangkongmaw a tho telah atipouh. Devit ni taminaw koe Lacik a kangkhong thai nahan BAWIPA hanelah thuengnae sak hanelah ka ngai teh nange laikawk ka ran hanelah ka tho telah atipouh.

²² Araunah ni Devit koevah, siangpahrang ka bawipa, ahawi na tie patetlah thueng yawkaw naseh. Hmaisawi thueng nahanelah maitotanaw ao. Thing hanelah laikawk puengcang, maitonaw e puengcangnaw hai ao telah atipouh.

²³ Oe siangpahrang, hetnaw pueng Araunah ni siangpahrang koevah a poe telah ati. Araunah ni siangpahrang koevah, BAWIPA na Cathut ni na coe lawi naseh telah atipouh.

²⁴ Siangpahrang ni Araunah koevah telah na-hoeh, apfu hoi na ran pouh han. Banghai pâbaw laipalah BAWIPA ka Cathut koe hmaisawi thuengnae ka poe mahoeh telah ati. Devit ni tangka shekel 50 touh hoi cangkatinnae hmuen hoi maitonaw hah a ran. ²⁵ Devit ni haw e a hmuen koe BAWIPA hanelah thuengnae a sak teh, hmaisawi thuengnae hoi roum thuengnae a poe. BAWIPA ni Isarel ram hanelah ratoumnae lawk hah a thai teh Lacik teh a kangkhong toe.

Thai Phum Holy Bible
The Holy Bible in the Thaiphum Chin language of Myanmar

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-01

PDF generated using Haiola and XeLaTeX on 1 May 2024 from source files dated 1 May 2024

84c7fe95-3b68-5ab6-b17e-a642d33ac078